

# *MAHLABA A PELEHI*

 Ha re inamiseng dihlooho tsa rona.

<sup>2</sup> Modimo o ratehang, kajeno re lebohela tsholohlo e kgolo ya Boteng ba Hao, hara rona, le jwale. Mme re lebeletse sena, tse tlodisang, monono, thapama ena. Re O leboha ka thoko e babatsehang ena e tswang ho mosadi ya kgabane enwa wa Mokreste ya sa tswa bina sefela sena; mme yaba Moya wa Hao o a theoha, le phetolelo ya hono. Morena, a ho be jwalo, re a rapela. Mme, Modimo, ke O rapela ho hlohonolofatsa e mong le e mong wa rona le mang le mang wa rona, mme dipelo tsa rona di ke di tlale thabo ha re bona ho etsahala sena.

<sup>3</sup> Modimo o ratehang, re a rapela, thapama ena, ba sa itokisetsang ho kopana le Wena haeba ba le teng mona, ena e be hora eo ba tla etsa qeto eo ya ho qetela mme ba kene ho Wena, ka Tswalo e ntjha. Aba sena.

<sup>4</sup> Re hlohonolofatse bohole, Morena, rona esale re kene tseleng halelele. Re O rapela ho re ruta dintho tse ntjha ka Lentswe la Hao. Re fe kutlwisiso e ntlatfetseng ka Moya wa Hao, Morena. A ke A tle a toloke Lentswe. Toloko e le nngwe eo re nang le yona ke Moya. Re rapela hore A tle a re abele seo, kajeno. Re kopa sena ka Lebitso la Jesu. Amen.

[Kgaitseki e mong o qala a porofeta. Sekgeo lebanteng—Mong.]

<sup>5</sup> Hoo ho lekane. [Moena e mong o buisana le moena e mong—Mong.] Ke nako e kakang! Ha ke tsebe tulo e ntle ho feta ho dula ho yona, haese Lehodimong, hoba re utlwa tlolo ya Hoo jwale, wa bona, ho dula mmoho dibakeng tsa Lehodimo ka ho Kreste Jesu, ho phutheha dibakeng tsa Lehodimo.

<sup>6</sup> Modimo a hlohonolofatse Kgaitseki Florence! Mme o feta nakong ya maswabi, le meriti; ntatae o tswa tswa nkuwa. Mme ke—ke a rapela, “Modimo, hlohonolofatsa ngwana eo.”

<sup>7</sup> Le Moena Demos, boima bo hodima mahetla a mabedi ao, le boima ba diboka tsena tsena tsohle le dintho. O hloka dithapelo tsa rona, le yena. Modimo a hlohonolofatse Moena Shakarian wa rona!

<sup>8</sup> Moena Carl Williams, ruri ke thabetse ho ba sebokeng sena le wena, hara baena bana bohole ba kgabane. Mme ke fumane monyetla wa ho kopana le ba bang. Mme jwale ena ke karolo ya ka e kwalang tshebeletso, kamoo ke tsebang, ka hona, kgele, ke lebeletse jwale ho tsukutla matsoho le ba bang ba banna bana ba kgabane, le—le ho kopana le bona, hobane ke lebeletse ho phela Bosafeleng le bona, kwana e—kwana Lefatsheng le molemo.

<sup>9</sup> Nthwana e—e itseng feela, ke tshepa ke sa tlo utlwisiswa ka phoso. Mme ha se taba e welaneng feela, ha ke hopole jwalo, hoba ke—ke nahana e tlide ka paballo e mohlolo, haele moo maobane ke filwe mpho ke motswalle wa ka mona, e tswa ho motswalle wa ka, Danny Henry. E ne le moshanyana... Ka tsatsi le leng, sebokeng sa Borakgwebo ba Bakreste kwana California, ke ne ke tshwere e—e tshebeletso. Ke ne ke bua ka thata kgahlano le—le maemo a nako.

<sup>10</sup> Mme ke—ke tshepa mang le mang a utlwisia seo, ha ke a boloka bokgopo pelong ya ka. Ha se ntho eo. Tjhe. Ruri le tla utlwisia hore ha ke e bolele jwalo. Empa feela ke tlameha ho bua feela se mphihlelang ho se bua.

<sup>11</sup> Mme yaba ka morao ho moo, thaka lena, moena wa Mobaptise... Mme ke a kgolwa ke leloko la kgalala ya ditshwantsho. Mme yaba o tla a nkopela ka sephaka sa hae, ho re, “Morena a o hlohonolofatse, Moena Branham. Ke mpa ke batla ho llahisa polelo ya thapelo.” Mme a qala a bua ka Sefora. Mme moshanyana ha a tsebe lentswe le le leng la Sefora.

<sup>12</sup> Mme yaba ho ema motho e mong, e batla e le mosadi ya ditho. Ya tswang... Ke kgolwa a ne a tswa Louisiana. A re, “Seo ke Sefora.”

Hape ha hlaha monna hodimo mono, ho re, “Seo ke Sefora.”

<sup>13</sup> Mme keha ba ngotse taba eo. Mona ke tshwere kopi ya mantlha. Mme yaba, kamoo ho etsahetseng, mohlanka a tla a tsamaya a tswa morao kwana, mme a tswela kapele, a batla ho bona dintlha tsa bona. Mme yena e le toloko ya Sefora ya Ditjhaba Tse Kopaneng. “Ke Sefora hantle.”

<sup>14</sup> Mme ke rata ho bala ntlha ena. Ena ke ntlha ya sethatong ya e mong wa bona, mme e tswile ho monna enwa ya tolokileng. Nka tshwana ke sa kgone ho bitsa lebitso la hae ka nepo. Le Doux, Victor Le Doux, ke Mofora wa madi a lesika. Jwale, molaetsa ke wona.

*Erekaha o kgethile tsela e tshesane, tsela e thata, o tsamaile ka boikgethelo ba hao, o nkile qeto e lokileng e nepileng, mme ke Tsela ya Ka. Ka baka la qeto ena ya motsotswana, kabelo e kgolo ya Lehodimo e o emetse. O entse qeto e kgabane hakakang! Yona, ka boyona, ke yona e tla etsahatsa, mme e phethahatse, tlholo e kgolo Bomodimo Leratong.*

<sup>15</sup> Eitse ha ke e fumana... Wa tseba, kgetlo la pele ha ke utlwa batho ba bua ka dipuo, ha ke—ke a kgona ho nyatsa letho, wa bona, hoba ke bone ntho ya makgonthe. Empa, esale ke ipotsa. Empa mohla seo se neng se etsahala, le ho tseba seo thomo e beng e le sona, e e tshehetsang, ka—ka tseba hobane e tswa ho Modimo.

<sup>16</sup> Yaba, moena wa hae ya dutseng mono, e—e leqwetha le tummeng, o mpha mpho e tswang ho Danny. Danny o sa tswa tloha Lefatsheng le Halalelang. Mme o ne a robetse lebitleng, ka hara lebitla, ke rialo, moo Jesu a na a robaditswe ka mora lefu la Hae. Mme hoba a etse jwalo, a re o ile a nkgopola. Mme—mme yaba Moya wa Morena o theohela hodima hae, mme a tswa a ya Thabeng ya Kalvari moo thakgiso e etsahetseng teng, mme a thonaka lejwana. Mme yaba o kgutla mme a mpetlela para ya mahokelo a dikholoro tsa matsoho a hempe. Mme ke hlile ke a thabetse bo.

<sup>17</sup> Mme jwale, sena, ehlile, Danny ha a tsebe letho la sena. Empa, hoseng hona, ha ke tswile ho kena thapelong, ka hlahloba mahokelo a dikholoro tsa matsoho a hempe, mme e nngwe le e nngwe ya tsona, ha le ka eellwa, e qhapaleditswe ke madi, mme mola o tsepameng o boetse o haola hara e nngwe le e nngwe. Mme mona molaetseng a o hlahisitseng o tswa ho Modimo, wa tsela e otlolohileng, tshesane. O nyalana le yona hakakang, hantle feela! Mohlomong e hlahisitswe ka paballo e mohlolo. Kapa, ke hlile ke leboha Danny. O mmolelle, moena, ke ananela hoo haholo. Mme e otlo—...Ntho e nngwe e makatsang, ke kopile mohatsa ka hoseng hona ha ke apara hempe, keha ke loketse ho e hokela lehokelo la dikholoro tsa matsoho, mme a re, “Ke lebetse ho tla le mahokelo a hao a dikholoro tsa matsoho a hempe,” mme Morena o ne a mpabaletse ka tse ding.

<sup>18</sup> Oh, boo ke bophelo bo babatsehang! Ha se bona, baena? [Phuthetho e re, “Amen.”—Mong.] Ho itsamela feela ka ho nyatseha ha—ha Evangedi! Mme leha ho le jwalo, ka ho nyatseha ha Yona, Ke ntho e kgolohadi eo ke e tsebang. Ha ke tsebe letho la Yona. Mme ka ho etswa ntho E nyatsehang, ke fuwe monyetla wa ho kena ho Yona, wa bona, le nna, ka mohau wa Modimo.

<sup>19</sup> Jwale, thapama ena, ha ke batle ho qeta nako e ngata, kaha ke tseba le ya dikerekeng bosius bona. Ke kgolwa, baeti bohole ba mona ba tlamehile ho sheba hohle kalaneng, ho bona bareri bana, mme bona, oh, ba tla thabela ho ba le lona tshebeletsong ya bona bosius bona. Ba tla le thabiswa. Ha ho pelaelo hoseng hona le ne le etetse sekolo se itseng sa Sontaha motseng. Mme e re re sa tshwere diboka tsena, mme e le Borakgwebo ba Evangedi e Tletseng, ke hopola re tlamehile ka hohle ho tshehetsha dikereke tsa rona ka bokgoni ba rona, hoba ke hona moo borakgwebo ba rona ba kenang teng. Mme, jwale, ke ntlu ya Modimo, mme ke a tshepa bosius bona le tla etela kereke e itseng.

<sup>20</sup> Seboka se phethelwa hosane bosiu, ke a kgolwa, mme ke kgolwa ba tsebisitse sebui. Etswe, ke ikemiseditse ho ba teng mona, ha Morena a ratile, ho utlwa molaetsa wa hae.

Modimo a hlohonolofatse e mong le e mong le mang le mang wa lona.

<sup>21</sup> Jwale, nna, ha ke a itlalehe ke le moreri. Ke—ke batla ke le... Ha ke a ruteha hakaalo ho ipitsa moreri. Moreri, ha o rialo, ba o lebeletse ho rua digarata tse mmalwa tsa kholeshe. Mme—mme ha ke a tshwara letho haese letjeketjane *Lena*. Wa bona? Ke leka ho sala nku e kulang morao, ha nka kgona, ho di busetsa lekgulong la Ntate.

<sup>22</sup> Ha nka etsa diphoso, le ntshwarele. Ha ke moithuti wa bodumedi. Ha ke seholle baithuti ba bodumedi. Thutabo—... Thutabodumedi e itoketse. Ke seo re se hlokang. Empa ka nako tse ding ke nyatsa maemo ao re keneng ho wona. Taba ena ha e a lebahana le motho ya itseng. Ke Molaetsa feels. Eka—eka E ka be e se wa ka ho o hlahisa. O ntabela dikoto, hoba o tseba kamoo motho a ikutlwang ka bana ba hao. Wa bona? Na ha le batle mohla le tlamehang ho omanya ngwana, ho kgaruma, kapa ntho e nngwe, le hona? Ke motswadi, le nna, ke a tseba hoo ho bolelang. Mme ke—ke tshepa le tla ntshwarela.

<sup>23</sup> Mme ke batla le sebetse tjena. Ha le ntse le dutse, thapama ena, ke tlilo le kopa mohau. Ke tshwere nthwana e kgutshwane, dintlha tse mmalwa mona. Kamoo ke boleletseng, ke tlamehile ho etsa tjena, ho ngola Mangolo a ka. Ke ne ke tlwaetse, nka qotsa Bibele ka pelo, empa e seng jwale. Ke fetile dintwa tse ngata haholo tse boima, ke tsofaletse hoo haholo. Empa ke tshepa le—le tla mmamella nakwana feels, thapama ena, mme le bule dipelo tsa lona ruri le leke ho utlwisia seo ke se tjhekang. Mme ke a kgolwa ho tla itokela, haholo badisa ba motse le dibaka tse fapaneng. Ke—ke tshepa le tla mamedisa ka hloko.

<sup>24</sup> Mme jwale le etse seo, le nketsise ha ke ja thatohatse ya phae ya ka, ya cheri. Nama e nngwe e leng thatohatse ya ka, kgoho. Empa ha ke ja sekotswana se monate sa phae ya cheri mme ke thulana le thootse, ha ke kgaotse phae. Ke mpa ke lahla thootse, ke nto tswella ho ja phae. Wa bona? Ha ke thulana le lesapo la kgoho; ha ke lahlele kgoho kwana. Ke mpa ke lahla lesapo.

<sup>25</sup> Ka hona, ho ka thweng ha nka bua selo seo o sa dumelaneng le sona, nako efe feels? Ako lahlele karolo eo kwana. Mme, empa, o e shebisise hantle, etsa bonneta hore ke lesapo, jwale. Wa bona? [Phuthetho e a tsheha—Mong.] Mme na nka boela ka bua, haeba e le Peo, aka hopole, E hlahisa Bophelo bo botjha. Ka hoo o shebisise ka thata, mme Morena a hlohonolofatse.

<sup>26</sup> Moena Carl Williams o buile nthwana bosiu bo bong malebana le ho tshwasoloha, ho rapella bakudi, etswe e ka ba ntho e ntle. Ke a tseba hoo ho ka ba hotle. Empa feels re... mona ha re a itlhophisetsa hoo, ho mema mola wa thapelo. Mme ha ke tsebe haeba Moena Oral, kapa mang feels wa baena

a kile a tshwarana le mela ya thapelo dibokeng kapa tjhe. Ha ke tsebe. Ke e lekile, habedi kapa hararo. Empa, ka tlwaelo, haeba letshwele le le tjena, o tla tlameha ho aba ditlankana tsa thapelo, wa bona, ho ka etsa hoo. Hobane, o ke ke wa kgona. Ha se arena. Ke ntlu ya Modimo. Wa bona? E kgethetswe morero oo. Mme rona... Ba hatellana ba sututsa. Mme ha o e na le ditlankana, o ba emisa moleng, ka taolo.

<sup>27</sup> Ka hona Billy o mpotsitse, ho re, “Na nka ya aba ditlankana thapelo? Batho ba ntse ba nkopa ditlankana tsa thapelo.”

<sup>28</sup> Ka re, “Tjhe, Billy. Ha re tlohele Moya o Halalelang ho etsa seo O batlang ho se etsa.” Wa bona? Hoo, wa bona, mme ere mohlolomong A ahe tumelo, mme le fodiswe hona moo le leng teng feela. Wa bona? Empa e... Wa bona?

<sup>29</sup> Phodiso ya Kgalalelo ke nthwana feela Evangeding. Mme o ke ke wa aha hodima nthwana e nyenyane. Mang le mang o tseba seo. Empa ba... Ke selope se sebediswang ho tshwasa batho ho dumela Boteng bo mohlolo, kapa Modimo, Mohlolo o teng. Mme hape, ka hono, haeba ba ka ellelwa Boteng ba Hae, ke hona moo ba fodiswang teng, wa bona, ka tumelo, ho E dumela.

<sup>30</sup> Jwale ke batla ho bala lethonyana Lentsweng la Modimo, Testamente e Ntjha. Mme ke batla ho qotsa theron mona Testamenteng e Ntjha, mme Lengolo lena, le ho bua thapama ena ka temana e-e nakwana. Mme ha ke batle ho le tshwarella ka baka la ditshebeletso bosiung bona. Empa hopolang, ke a tshepa ke itlhakisitse. E adimeng maikutlo a lona nakwana, ha le rata.

Jwale, pele re etsa sena, ha re boeleng re inamise dihlooho tsa rona.

<sup>31</sup> Wa tseba, re ka bina tlolo. Ra howeletsa tlolo, ra ba ra tjha lentswe. Mme ra bina ka nako e phoso, kapa ho howeletsa ka nako e phoso. Empa ntho e le nngwe ke ena, ha re ke re tswa taolong ha re rapela. “Eka batho bohole ba ka rapela hohle, ba phahamisitse matsoho a halelang, ba sa belaele.” Kapa...

<sup>32</sup> Ntate, monyetla o moholohadi oo motho ya buswang ke lefu a kileng a o fuwa, e ne e le ho kwala mahlo a hae le ho bula pelo ya hae, le ho buisana le Wena. Mme re a tseba O a utlwa, holane feela re ka dumela hore O a utlwa. Hoba Jesu o itse, “Ha le kopa letho ho Ntate ka Lebitso la Ka, le tla le newa.” Mono e le hodima dipeelo, haeba re sa belaele. Ka baka leo, Ntate, o re thuse ho dumela, thapama ena, diqelo tsa rona di tle di abjwe. Mme le pelaelonyana e se be teng, kae kapa kae. Empa e ke e etsahale, e leng dintho tseo re di kopang. Mme moo ke ho re, Modimo, kajeno Lebitso la Hao le leholo le tle le bokwe, ka ho kenya Mmusong wa Hao hohle ho lahlehileng le

moya o lelerang o dutseng tlasa modumo wa lenseswe la rona, kapa oo teipi ena e tla o fihlela, kwana dinaheng tsa bahetene, moo di yang teng lefatshe ho pota.

<sup>33</sup> Ke a rapela, Ntate wa Lehodimo, ho se be le motho ya tetemang hara rona kajeno. E tle re ha tshebeletso e tswile, Morena Modimo a tle a pholose moyo ka mong o timetseng, le ho fodisa mmele ka mong o kulang, le ho tlatsa pelo ya bana ba Hae ka thabo. Ke ka baka leo re nang le tumelo, Morena, ho kopa ka Lebitso la Jesu, ho Modimo Ntata rona, hoba A tshepisitse A tla utlwa. Mme hona ho etsetswa tlotliso ya Hae. Amen.

<sup>34</sup> Evangeding ya Mohalaledi Johanne, kgaolo ya 17, le ho qala ka temana ya 20, ke batla ho bala e—e mohlodithero. Ke a kgolwa ke yona.

*Ha ke rapelle bona feela, empa le ba tlang ho dumela  
ka dipolelo ya bona;*

*Bohle . . .*

<sup>35</sup> Ke a kgolwa ke tshwere sebaka se phoso. Jwale, ntshwareleng nakwana. Ke batlana le thapelo ya Jesu eo... Kapa, e seng thapelo ya Jesu, ke rialo, empa taba ya Hae... Ekaba ke tshwaile mohlodithero wa ka o phoso mona. Ke moo Jesu a rapetseng ho re...kapa a buileng a re ho jwaleka mosadi ha a fehelwa pelehing tswalong ya ngwana wa hae, tswalo, tswalo ya ngwana.

<sup>36</sup> E ho Luka kapa Johanne? Jack, e ho kae? [Motho o re, “Johanne 16.”—Mong.] 16 la Johanne. Ke itse e nepahetse, empa ha e a utlwahala e le yona. Ya 16 ya Johanne. [“Temana ya 21.”] Temana ya 21. [E mong o re, “E.”] Ehlide, temana ya 21. Ehlide. Ke rona bana. Johanne, Mohalaledi Johanne 16:21.

*Bohle ba . . . tle ba . . .*

<sup>37</sup> Tjhe, Moena Jack, e sa ntse e fosahetse. [Motho o re, “Ako leke Johanne, temana ya 21.”] E mong o re, “21.” E mong o re, “Temana ya 21 ya 16.” E mong o re, “16.”—Mong.] Ke mashome a mabedi—...16:21. Ke tshwere kgaolo ya 16 ya Mohalaledi Johanne, temana ya 21. Empa e...Ebe ke nna ya phoso? [Moena o re, “E re ke e fetise, e le hantle moo e leng teng.”]

<sup>38</sup> Be, ho na le pherekano mona, mofererefere Bibeleng ena. E, monghadi. [Moena e mong o re, “Ba—ba e hatisitse ka phoso.”—Mong.] Ba hatisitse ka phoso. E, monghadi. [Phutheho e a tsheha.] Wa tseba ke’ng? Ke nnete e tiileng eo. Ena ke Bibele e ntjha—ntjha. Ke sa tswa e fumana. Mme e na—e na le...E hatisitswe ka phoso. [Maqephe 1138–1139 a Bibele ya Moena Branham ya Scofield a ne a matahane mmoho. Utlwang taba ena ho *Kajeno Lena Lengolo Lena Le Etsahetse* 65–0219.]

<sup>39</sup> [Arekabishopo wa Mokatolike ya emeng kalaneng, Mor. John S. Stanley, o tswela kapele o neeletsa Moena Branham

Bibele ya hae, a nto re, “Feela—feela aka ntshe letshweya. Taba eo e entswe ka morero, mme o a tseba. Modimo o tlilo o bontsha a ntshe letho mona, e a babatseha.”—Mong.] Ho lokile. [“Ako sebedise ya ka mona, moena.”] Ke a o leboha. Ke o leboha, haholo. 16:21. Ke o leboha, haholo. E nepahetse.

*Ere mosadi ha a . . .*

*Kannete-nete, ke re ho lona, Le tla robala, lla le be le lle, mme lefatshe le tla thaba: le tla utlwa bohloko, . . . bohloko ba lona bo tla fetoha ho ba thabo.*

*Ere mosadi ha a—a beleha a utlwae bohloko, hobane nako ya hae e fihlide: empa ha a tswetse ngwana, a lebale . . . tsietsi—tsietsi ya hae, ka baka la thabo ya hobane motho o tswetswe lefatsheng.*

<sup>40</sup> Ke o leboha, haholo, moena wa ka. Ruri ke ananela seo. [Moena Branham o busetsa Bibele ho moprista wa Mokatolike—Mong.]

<sup>41</sup> Jwale, ruri eo ke kgatiso e phoso mona Bibeleng; leqephe le manehilwe ka phoso. Mme ke sa tswa e fumana hodima Bibele ya ka ya kgale ya Scofield, mme ka phamola ena ka mathela kwano ka yona, metsotso e mmalwa e fetileng, hoba mohatsa ka o sa tswa mpha yona e le mpho ya Keresemose.

<sup>42</sup> Jwale, ke batla ho—ho bua thapama ena ka temana eo ke e tsebisitseng: *Mahlaba A Pelehi*. Jwale, se utlwahala hampe, empa se ka hara Bibele.

<sup>43</sup> Jesu mona ke kgolwa a ne a bua ka seo, kamoo A buileng, “Le tla utlwa bohloko, empa bohloko ba lona e be thabo,” o bua le barutuwa ba Hae mona, o tsebile hobane tswalo ya—ya Bokreste e kena temeng. Mme jwale ya kgale e tshwanela ho shwa, ho tle ho tswalwe e ntjha. Ntho efe feela ho hlahisa tswalo, eka kgona e tsietswe ke lehlaba. Me ruri ba ne ba tsietswa ke lehlaba le mahlamola, ho falla molaong ho kena mohaung.

<sup>44</sup> Ka tlwaelo, tswalo ya hlaho e bapisa tswalo ya Moya. Tsohle tsa hlaho ke dipapiso tsa moy. Mme re a fumana, ha re sheba ka tle mona hodimo—hodimo mobung, mme re bona sefate lefatsheng, se mela, se lwanelo bophelo. Hoo ho supa ho ena le sefate, kae—kae, se sa shweng, hobane se—se tsetselela ho hong.

<sup>45</sup> Re fumana batho, ho sa tsottelehe ba hodile ha kae, ba kula ha kae, ba maemong afe, ba ntse ba howeletsa, ho phela, hoba hoo ho supa bophelo bo leng teng kae—kae moo re phelang, ho phela ka mehla. Lemohang e phethahetseng hakae.

<sup>46</sup> Jwale, ho Johanne wa Pele 5:7, ke kgolwa e le yona, ha ke sa fose, E boletse, “Ho le tse tharo tse pakang Lehodimong: Ntate, Lentswe, le Moya o Halalelang; tse tharo tsena ke ntho e le Nngwe. Ho le tse tharo tse pakang lefatsheng, ke metsi,

Madi, le Moya, mme tsona di a dumellana.” Jwale lemohang. Tsa pele tse tharo *ke ntho e le Nngwe*. Tsa bobedi tse tharo ke tsa lefatshe, di a *dumellana*. O ke ke wa fumana Ntate Mora a le siyo; o ke ke wa fumana Mora Moya o Halalelang a le siyo. Empa o ka fumana metsi Madi a le siyo, le Madi Moya o le siyo.

<sup>47</sup> Ke nahana, mehleng ya mengwaha ya rona, sena se pakilwe ka nepo; metsi, Madi, Moya; tokafatso, kgalaletso, kolobetso ya Moya o Halalelang. Hoo ho bapisa, kapa seo se bopa e...kapa, ke papiso-maleba, e qopitsang tswalo ya hlaho.

<sup>48</sup> Shebang ha e—e mosadi kapa ntho efe e fehelwa, pelehing. Ntho ya pele e hlahang, ho pshatleha metsi, tswalong ya hlaho; ntho ya bobedi ke madi; ebe ho latela bophelo. Metsi, madi, moyo; mme hoo ho bopa tswalo ya tlwaelo, ya hlaho.

<sup>49</sup> Mme ho jwalo le sedikeng tsa moyo. Ke metsi; tokafatso ka tumelo, ho dumela Modimo, ho Mo amohela e le Mmoloki wa hao, le ho kolobetswa. Bobeding, ke kgalaletso ya moyo, moo Modimo a hlatswang moyo mesebetsing yohle ya lefatshe, le takatsong ya lefatshe. Mme ebe moo Moya o Halalelang o kenang mme o hlahisa Tswalo e ntjha mme o tlatsa lefiso le halaletseng leo.

<sup>50</sup> Ho tea mohla, tjena. Jwale, hono, ke le boleletse. Seo o sa se dumeleng, o se belle ka thoko, o nto ja phae. Lemoha. Jwale, e—e galase e robetse ka ntle jareteng ya dikgoho. Ha o ke o e thonaka o e bea tafoleng ya hao o e tlatsa metsi kapa lebese. Tjhe. Ho e thonaka, ke tokafatso. Ho e hlwekisa, ke kgalaletso, hoba lentswe la Segerike *kgalaletso* ke lentswe le menahaneng, le bolelang “ho hlwekisa, le ho beella ka thoko ho sebediswa.” Ha se ho *kenngwa tshebetsong*; ka *morero* wa tshebetso. E re ha o e tlatsa, e kenngwa tshebetsong.

<sup>51</sup> Tswarelang sena jwale, ha se ho thonkga. Ke hona moo lona Pilgrim Holiness, Manazarene le sitwang ho tsamaya le nyoloha ho kena Pentekosta. Le kile la hlatsuwa ka kgalaletso; empa mohla le seng le tla kenngwa tshebetsong, ka dineo tsa ho bua ka dipuo le dintho tse ding, la e hana, la honyela morao lemeneng. Wa bona? Jwale, seo—seo ke sona se etsahalang. Se sebetsa jwalo ka mehla.

<sup>52</sup> Jwale, ha se ho le nyatsa jwale, ke mpa feela ke—ke batla ho e tlosa pelong ya ka. Mme esale e ntjhesa ho tloha ke fihlile mona, nka mpa ka e tlosa. Feel, haeba mohau wa Carl, le wa Demos le bao, le wa lona bohole, ke—ke tla leka ka bokgoni ba ka ho lopolla moyo wa ka ho yona, wa bona, e be e ho lona.

Ya tlwaelo, e bapisa ya moyo.

<sup>53</sup> Jwale, re a fumana, mme e tswalwa ka botlalo. Ha lesea, ka tlwaelo...Jwale ha metsi a pshatleha, ha o a lokela ho sebetsa ha kaalo. Mme ha madi a fihla, ha o a lokela ho sebetsa ha kaalo. Empa, ho kenya bophelo ho lesea, o lokela ho mo

patlotsa, le ho mo bokollisa. Mme hoo ke...Jwale, ka ho hloka thuto, jwaleka baena beso mona ba rupeletsweng hantle hakana mono, ya bona, empa nna ke loketse ho nka hlaho ho e bapisa. Mme ke moo he. Ke sona se etsahetseng. E qositse patlotso ya makgonthe, ho ba tlisetsa yona.

<sup>54</sup> Jwale, o nka nthwana, ho tsukutlwa ha mofuta. Mohlomong, ha o a tlameha ho mo patlotsa, haese ho mo tsukutla nakwana. Wona mohopolo wa tswalo ya hae, ka dinako tse ding, o ye o etse seo. Ho mo phamola, ho mo kgohllopha. Haeba a sa phefumolohe, ho mo patlotsa ha nyenyane, a nto hlaba seboko, ka puo e sa tsejweng, ho yena, ke a kgolwa. Empa, yena—yena, leha ho le jwalo, mme o etsa lerata.

<sup>55</sup> Mme ke nahana ha lesea le tswalwa feela ka—ka tswalo e kgutsitseng, lerata le le siyo, maikutlo a le siyo, ke lesea le shweleng.

<sup>56</sup> Ke bona bothata ba kereke kajeno, tsamaiso; re fumana bana ba bangata ba tswalwang ba kgathetse. Ke hantle. Ba hloka patlotso ya Evangedi, wa bona, le ho ba tsosa, ba tle ba iphumane, Modimo a tle a budulele phefumoloho ya Bophelo ka ho bona. Mme jwale re fumana hoo ho nepahetse. Ke thutamodimo e kgohlahetseng, empa ke Nnete, leha ho le jwalo.

<sup>57</sup> Ka hona, lemoha, tswalong ya peo, peo ya kgale e tshwanetse ho shwa pele ho tswalwa e ntjha. Ka hona, ha ho le jwalo, lefu le thata, nako efe feela. Ka hona, le bohloko. Le a hlabevisa. Tswalo e a itshwanelo, hobane o ntse o tlisa bophelo lefatsheng, mme e—e bohloko.

<sup>58</sup> Jesu o itse Lentswe la Hae ke Peo eo mojadi a tswileng ho e jala. Jwale, bohole re tseba seo. Mme ke batla ho e ruta eka thuto ya sekolo sa Sontaha, hobane ke Sontaha. Lemohang, hape, Lentswe lena, ke Peo. Empa, hopolang, e—e peo e hlahisa bophelo bo botjha feela ha e shwa.

<sup>59</sup> Mme ke ka hona ho bile boima ho Baifarasi bao ho utlwisia Morena Jesu Kreste wa rona, hoba ba ne ba le tlasa molao. Mme molao e le Lentswe la Modimo ka sebopeho sa peo. Empa yareha Lentswe le etswa nama, mme le fetoha, e seng molao, empa mohau. Jwale, mohau le molao di ke ke tsa dula ka nako e le nngwe. Hobane, mohau o phahametse molao hakana, ebile molao ha o hlahe lephallong. Mme ka hona ho boima haholo ho Baifarasi ho shwa molaong wa bona, mohau o tle o tswalwe. Empa o tlameha ho sutha. Melao e mebedi e ke ke ya aha ka nako e le nngwe.

<sup>60</sup> Ha ho molao o ka o reng o ka tlola tshupatshwao ena, le o mong o reng o ka e tlola; o mong o reng o ka kgona, o mong o reng o ke ke wa kgona. Yona, eka kgona e be molao o le mong

ka nako. Neng-neng o ka e feta mohwalotso; hlokomela, wa e tlola. Empa jwale e kgubedu. Ema! Wa bona? Mme ho ke ke ha hlongwa melao e mebedi ka nako e le nngwe.

<sup>61</sup> Jwale, re a elellwa ka mehla ho... Mohopolo wa ka ho lona, ho qosa lehlaba, hlomoho, maswabi. Shebang kamoo Bafarasi bao ba shweleng nqa molao oo, ka lehlaba, tsieleho, maswabi. Empa e tshwanetse jwalo.

<sup>62</sup> Jwale, re fumana pula e tlisang tholwana hodima lefatshe, “E tswalwa,” se ka seroki se buile, “lepatlelong la seaduma, hara dipakapaka tse befileng, tsa ditsenene.” Empa hola re sa fumana seaduma le dipakapaka tse befileng, tsa ditsenene, lerothodi la pula le mathamalodi le rathotsweng le nyollwa mawatleng mme le ratholwa letsing, le be le sa tlo tswalwa. Ho qosa lehadima leo, ho qhoma ha seaduma; pefo, matswedintsweke, botshabeho, ho hlahisa marothodi a bonolo a boleya a metsi. Tswalo e hlahiswa ke lehlaba. Ho qosa lefu. Mme ereha maru a eshwa, ho tswalwe pula, hoba pula ke karolo ya leru leo. Hore e nngwe e be e teng e nngwe e tlameha ho sutha.

<sup>63</sup> Jwale, mme baena beso mona, bang ba bona ba kgonne, ba ka le fa melao ya dintho tseo tsohle. Nna ha ke kgone.

<sup>64</sup> Jwale ha re akgeleng ntho e nngwe, e le bopaki bo bonyenyane. Ke nahana e nngwe ya dipalesa tse ntle... Mang le mang o na le mehopolo ya bona ka tsona. Empa ke nahana palesa e ntle ho feta nkileng ka e bona, ke motsheo kwana botjhabela, seohla sa rona sa letsha. Ba kileng ba bona seohla sa letsha ba ba kae? Oh, ha ho ntho e kang sona, ho nna. Empa ana le lemo hile seo seohla seo sa letsha se lokelang ho ba sona? Ke nahana seo Jesu a se buileng, “Bonang diohla, kamoo di ohlang di sebetsang, empa Ke re ho lona, ho re, Salomone le kganyeng ya hae yohle ha eso apere jwaleka se seng.” Hobane, kganya ya Salomone le mekgabo ya hae e be e le tsa maiqapelo kaofela. Empa seohla, botle ba sona, bophelo ke bona bo se ntla fatsang, ha se ka setollo se itseng sa maiqapelo, ho neta ferefef.

<sup>65</sup> Jwaleka basadi ba rona, ha ke kgolwe le tlameha ho tshasa botala bona bohole, wa tseba, le dipanya-panya tsa leihlo, wa tseba, ho tswa jwalo, le pilo eo yohle kapa-kapa ha se yona, ke e a e dubakanya, hohle sefahlehong sa hao, ho o ntla fatsa. Botle ke diketso. Ha o ka eketsa Diketso 2:4, wa di kopanya mmoho, Johanne 3:16 e seng kae, di ka hlola sohle seo Max Factor e kileng ya leka ho se tswaka. Wa bona? Monna wa hao o tla eketsa ho o rata; mang le mang; ke a kgolwa le Modimo.

<sup>66</sup> “Seohla,” O boletse, “o lemo heng, kamoo o holang, o ohlang, o tlameha ho inyolla.” Seohla sena sa letsha, shebang se fetile kae; mobu, tshila, seretse, metsi a seretse, metsi a ditshila. Sa fohla sa feta hara seo sohle, lefinyana lena la

bophelo, le sebetsa le tswa botebong ba letsha moo dihoho le—le dintho di ahileng, le ntano inyolla le fohla tseo tsohle. Empa mohla le fihlang ka pela mahlasedi a letsatsi, le a tswalwa. Peonyana e a phatloha mme e a phela. E ka sitwa ho etsa jwalo ha we sa fete mehatong eo yohle. E tlameha ho haola le moo. E etswa ke seo, hobane letsatsi ka bolona le a e hula. Mme mohla se hlahang hodima metsi wohle a ditshila, le tshila, le tse jwalo, se thabile haholo. Se ineela se sa lefise moputso. Mme bophelo bo botle ha se fihla ka pela sefahleho sa ntho e se hulelang hodimo.

<sup>67</sup> Ke hopola e le papiso e kgabane ya bophelo ba Mokreste. Mohla, Ntho e o hotollang lefatsheng, ho fihlela tsatsi le leng o tswallwa ka pela sefahleho sa Yona, ke Moya o Halalelang. Ho hotle hakakang! Ha o leka ho e thusa, o tla e bolaya.

<sup>68</sup> Jwaleka tsuanyana ha e tswalwa, wa tseba, ha o kile wa sheba le leng la mathata ao, hantle hodima molongwana wa yona, kapa nonyana efe feela e qhotswang ke lehe. E—e na le... E ntse e hola, kgaketlana ena ya kgale ya lehe. Dikarolwana tsa kgale tsa mahe tse ka hare di tlameha ho—ho bola. Mme e tlamehile ho kokosa molongwana wa yona, e fala e ya pele le morao ho fihlela e thuha kgaketlana. Re e bitsa jwalo, e a hlwedisa e a bitoha, tlase Kentucky moo ke tswang teng. Ho hlwedisa e bitoha. Ha ba eso sibolle mokgwa o molengwana. Wa bona? Wa bona? Hobaneng? Ke tsela abilweng ke Modimo. Ha o leka ho e thusa, o tla e bolaya. Ha o ebola kgaketlana hodima yona, e tla shwa. Wa bona? E tlameha ho semella, ho peseletsa, ho phunyeletsa.

<sup>69</sup> Mokreste o tlameha ho sebetsa jwalo. Ha se motho ya o tsukutlang feela ka letsoho, ho o kenya ka hare. O tlameha ho robala mono ho fihlela o shwele, o bola, mme o tswallwa Mmusong wa Modimo. Ke tsela ya Modimo e lokisitsweng. Ha o kene ka buka, kapa ho tsukutlana ka matsoho, le ho ngodisa, ho pompuwa, ho theolwa. O—o mpa feela o tlameha ho sutha kgaketleng ya kgale. Lemohang, ha ho eso sibollwe tsela e molengwana ho feta.

<sup>70</sup> Ha ba eso sibolle mokgwa o molengwana ho lesea ho fumana seo le se batlang haese ka tsela ya Modimo. Jwale, lesea leo ha le tswalwa, o ka hloma manyenenyene mono pela moalo wa lona, ho re, “Moranyana wa ka, nna ke—ke moithuti wa thutabomodimo mokgweng ona. Ke badile dibuka kamoo lesea le a hodiswang kateng. Mme, ke a o jwetsa, o ngwana wa mehla ya jwale. O hlahetse lelapeng la mehla ya jwale, ka motswadi wa mehla ya jwale. Ha o lapile, kapa o hloka mme kapa nna, aka letse manyenenyene ao feela.” E ke ke ya sebetsa. Mokgwa o le mong ho fumana seo le se batlang, ke ho se llela. Eo ke tsela ya Modimo.

<sup>71</sup> Mme le rona re fumana jwalo seo re se batlang, ka ho se llela. Howeletsa. O se ke wa swaba. Ho re, "Ke lapetse Modimo." Ho sa tsottelehe na batiakone, badisa, kapa ho haufi ke'ng, hlaba seboko, leha ho le jwalo. Leha ba ha Jones ba dutse mono; phapang ke efe? Howeletsa, ke yona feela tsela ya ho e fumana, ho fihlela o thuswa. O e rutile mohla A leng lefatsheng mona, wa tseba, ka moahlodi ya sa lokang.

<sup>72</sup> Phophi ya phoka, ha ke tsebe mmopo wa yona. Mona ho ka ba le mahlale a... Ke tla bua feela kamoo ke nahanang. Ha re re ho kgobokana seholopho sa atemosefere e teteaneng nakong ya bosiu bo lefifi, mme e rothela lefatsheng. Mme ha e etsa jwalo, e tswalwa bosiu. Empa hoseng, e sa ntse e robetse mono, e hatsetse, mme e a tlakasela, e hodima leqoba la jwang, kapa e leketlile terateng ya hao ya diaparo. Empa e re hang letsatsi le tjhabé, ana o lemohile e nyakalla jwang? E a phatsima mme e a thothomela. Hobaneng? E a tseba hobane lehlasedi leo la letsatsi le tlilo e hulela moo e ne le teng qalong.

<sup>73</sup> Mme ho a tshwana le ka monna kapa mosadi ya tswetsweng ke Moya wa Modimo. Ntho e teng ka yona, ha Lesedi le hasana hodima rona, re a thaba, hoba re a tseba re ya moo re tswang teng, ho tswa sefubeng sa Modimo.

<sup>74</sup> E kgora ho bentshwa ke thabo, ha letsatsi le e tjhabela, ehlide, e a tseba e ya moo e tswang teng.

<sup>75</sup> Ke dinthwana tse kgohlahetseng, empa re ka tswelapele ka tsona, empa ha re fumaneng ntho e nngwe esele.

<sup>76</sup> Re a tseba peo ya kgale e jwalo, e tshwanetse, pele peo e ntjha e tswa peong ya kgale, e tshwanela ho bola, ka bonneta. E seng ho shwa, feela, empa ho bola ka mora lefu la yona. Re a tseba hoo ho nepahetse.

<sup>77</sup> Le ka Tswalo e ntjha ho a tshwana. Ha re kgutlele morao, empa ha re tswalwa labobedi o ya pele. Mme ke hona moo ke hopolang, kajeno, re fumanang (tsé ngata hakana) di se ngata, ke rialo, Ditswalo tse ntjha tsa makgonthe, ke hobane peo, mohlolong, e utlwela Lentswe bohloko kapa motho, empa ha ba batle ho bola tsamaisong ya kgale eo ba kileng ba dula ho yona. Ha ba batle ho tswa ho yona. Ba batla ho dula tsamaisong ya kgale, mme ba itlalehe Tswalo e ntjha, kapa Molaetsa wa mongwaha. Re fumane seo tlasa Luthere, Wesele, Mapentekosta, le mengwaha e meng yohle. Ba sa leka ho tiisetse tsamaiso ya kgale, mme ba itlalehe Sena. Empa mongwaha wa tsamaiso ya kgale o tshwanela ho shwa, ho bola, ho hlahisa o motjha. Ba sa ntse ba batla ho kgomarela.

<sup>78</sup> Lemohang. Ba tseba hobane tsamaiso ya kgale e shwele, ba mpa ba sa batle ho bola ho tswa ho yona. Jwale, ho bola, ke mohla ho fedileng ka yona. Ha ntho e... Ha *tseko* e ritelwa, ho thwe ba Tswetswe botjha, empa tseko ke sesupo sa kemolo. Ho

*bola*, ho hlahisa Tswalo e ntjha. O tlameha ho bola o tlohe ho yona, kamoo re sebeditseng mengwaheng yohle, kgabareng ya Mawesele, le dintho jwalo.

<sup>79</sup> Empa, empa kgang ke ena, ka morao ho moo, ho tswalwa Tswalo e ntjha. Wesele kapa... Luthere o tswile ka lentswe le le leng, “Ba lokileng ba tla phela ka tumelo.” Be, a ke ke a hlola a kgomarela tsamaiso ya kgale. A tlameha ho tswa ho yona.

<sup>80</sup> Mme eitse ha Macalavinisi ba kenya kereke ya Anglica maemong ao, tlasa thuto ya Bocalvinisi, Modimo wa ba wa hlahisa thuto ya Boarminiane, yona e le John Wesley. Tsamaiso ya kgale ya tlameha ho shwa, ho tle ho kene e ntjha.

<sup>81</sup> Mme hoba mongwaha wa Wesele o kgaotse, le mengwaha yohle e menyenyane, kapa maqoba a tswileng tlhakeng, kapa tjellaneng, nakong ya Wesele. Wa bona, mohla Pentekosta e ne e bitoha ka kgutlisetso ya dineo, keha ba tlamehile ho tswa Baptise, Presbeteriene, Pilgrim Holiness, Manazarene, kereke ya Kreste, eo ho thweng ke yona, le seo sohle. Keha ba tlamehile ho tswa ho yona, ho bolla hole le yona, ho amohela Tswalo e ntjha.

<sup>82</sup> Kamehla o tlalehwa o hlanya. Empa eka Pauluse ya buileng mohla a ne a bola a tswa ho seo a kileng a itlaleha sona. Ho re, “Ka mokgwa o reilweng bohlanya, ke sebeletsa Modimo wa bontata rona jwalo.” Ka mokgwa o reilweng bohlanya! Wa bona? O ne a amohetse Bophelo bo botjha, hore Testamente ya Kgale e ne e Tswetse e Ntjha, mme a tlameha ho bola nqa ya Kgale le ho e fetola seriti feela. Ho re ho tle ho...

<sup>83</sup> Ke moo re leng teng hantle hona jwale. Jwale, le mmamelle. Empa ke mohopolo wa ka oo. Dikereke di kene tsamaisong hoo o sa kgoneng ho kena ho e nngwe o se setho sa e nngwe. O tlameha ho fumana setlankana sa botho, kapa boitsebiso ba mofuta. Mme ka ho dumela sena, monyako o le mong oo ke o bulletsweng ke Borakgwebo bana. Mme ha feela e se mokgatlo, nka kgema le bona, empa, mme nka kgona ho tlisa Molaetsa, oo ke utlwang o dutse pelong ya ka, ho batho. Empa e kena tsamaisong haholo. Mme ke a le rata lona batho ba Pentekosta. Mme pentekosta ha se mokgatlo, le hona. Le mpa le ipitsa hoo. Pentekosta ke boiphihlelo mme e seng mokgatlo.

<sup>84</sup> Empa, wa bona, lebaka la yona, e thatafalla banna ba bangata haholo. Ha ba Le sheba mme ba Le dumela, mme ba Le bona le pakahatswa hakana ke Modimo, ka hara Lentswe, le jwale, ho thata ho bola nqa ntho eo o kileng wa ba ho yona. “Nka etsang? Ke fumana dijo tsa ka ho kae?”

<sup>85</sup> Eng? Modimo ke dijo tsa hao. Ntho o tlamehang ho itshwarella ka yona ke Modimo. “Le batle Mmuso wa Modimo, le ho loka ha Hae.” Ke tla e tlohela e robetse mono. Le tseba seo ke se buang.

<sup>86</sup> Baporofeta ba Modimo ba re bolella re tla ba le lefatshe le letjha, Lehodimo le letjha le lefatshe le letjha. Ha o batla Lengolo la hoo, ke Tshenolo 21. Nka le balla lona, ke le tshwere mona. Johanne o itse, “Ka bona Lehodimo le letjha le lefatshe le letjha: hobane lehodimo la pele le lefatshe la pele di ne di fetile.” Le ne le fetile. Jwale, haeba re tliro fumana lefatshe le letjha, lefatshe la kgale le lefatshe le letjha di ke ke tsa hlola ka nako e le nngwe. Kapa, lefatshe le letjha le lefatshe la kgale a ke ke a hlola ka nako e le nngwe. Ho ke ke ha hlongwa ditsamaiso tse pedi tsa lefatshe ka nako e le nngwe. Jwale, ho fumana lefatshe le letjha, la kgale le tlamehile ho shwa. Jwale, efela la kgale ha le tlamehile ho shwa, ke moo le ntseng le tshwerwe ke mahlaba a pelehi ho hlahisa le letjha jwale.

<sup>87</sup> Mme ngaka ha e tloha ho ya hlahloba moimana ya fehelwang jwale, yona... e nngwe ya dintho tseo ngaka e tla di etsa. Etswe, ke bua pontsheng ya babedi kapa ba bararo, bao ke ba tsebang, dingaka tse kgabane tsa meriana mona, dingaka tsa Bakreste. Mme nka—nka—nka le botsa sena. E nngwe ya dintho tsa pele ngaka e di etsang, hoba e lekole mokudi, ke ho lemoha dinako tsa mahlaba, mahlaba a pelehi. O sheba dinako tsa mahlaba, hore a atamelane ha kae, le kamoo le leng le hakalang kateng. Le leng le thata ho mamellwa ho feta le leng. Le latelang, le toota le hakala ho feta, a atamelana ho feta. O hlahloba bothata ba hae ka tsela eo, ka mahlaba a pelehi.

<sup>88</sup> Be, efela ha lefatshe le tlamehile ho suthela tswalo ya lefatshe le letjha, ha re hlahlobeng mahlaba a mang a pelehi ao re a fumanang lefatsheng, mme ke moo bonnyane re tla bona letsatsi le hore boimana ba lona bo kgathile tema ha kae.

<sup>89</sup> Ntwa ya Pele ya Lefatshe e supile mahlaba a maholo a pelehi. E supile le leng la mahlaba a pele a pelehi a le dihelang pelehing. Hobane mehleng eo ya lona, ra na ra hlahisa dibomo, re bile re kokositse dimachinikane, le digase tse tjhefu. Mme le sa hopola. Mohlomong bongata ba lona ha bo kgone. Mohlang oo ke le moshanyana wa dilemo tse ka robang meno e mebedi, empa ke sa hopola mohla ba buang ka gase ena e tshehla le chlorine, le dintho tse jwalo. “Kamoo e bonahetseng e qadile mme,” ba re, “e ka tjhesa lefatshe lohle. E ka bolaya motho e mong le e mong. Be, mohlomong le ho e—e—e pshatla feela, moyo o ka e pheulela lefatsheng.” Le kamoo sebetsahadi seo sa gase e tjhefu se beng se harotse motho mang le mang letsawalo! Lefatshe le ile la phomella, le kgohlotjwa ke mahlaba a lona a pele a pelehi.

<sup>90</sup> Mme jwale re a fumana, re fetile ntweng ya bobedi ya lefatshe, Ntwa ya Lefatshe, mme mahlaba a lona a toota haholo. A mpefala ho feta nako le nako, mahlaba a lefatshe a pelehi. Le kile la tlameha ho sutha, mehleng ya ntwa ya

athomiki, hoba e ne e ka falatsa motse wohle. E le kgolwanyane ho feta mahlaba a Ntwa ya Pele ya Lefatshe, ha ho buuwa ka tshenyo ya lefatshe.

<sup>91</sup> Jwale, le a tseba nako ya lona ya ho beleha e haufi. Ke ka baka leo le tshohileng hakana, le ferekane, tjenana, ke ka hobane ba sibolotse bomo ya haedrojene, le dimisale tsa sepakapaka tse ka senyang lefatshe lohle. Setjhaba se seng se tshohile se seng, ho sa tsotelehe bonyenyane ba sona. Ba sibolotse dimisale tseo ba reng di tla... O le mong. Ba ka e laola ka dinaledi mme ba e lahlele hohle moo ba batlang lefatsheng.

<sup>92</sup> Rashia, ha ke utlwa ditabeng, letsatsi le leng, e re e ka timetsa setjhaba sena, mme—mme ya baballa setjhaba sa yona se sa phatlolwe ke diathomo. Ha re tsebe re ka etsang ka hono. Mang le mang o etsa dihlahiso tsena, mme ho jwalo.

<sup>93</sup> Mahlale a batho a fohlile a kene laboratoring e kgolo ya Modimo, ebole ba tliro itimetsa. Modimo o e dumella, ka mehla o dumella bohlale ho itimetsa. Modimo ha o ke o timetsa letho. Motho o itimetsa ka bohlale, jwaleka ha a entse qalong, ka ho inkela bohlale ba Satane sebakeng sa Lentswe la Modimo.

Jwale, le a tseba le tlamehile ho sutha. Le ke ke la nna la tiya.

<sup>94</sup> Rashia, ke a kgolwa, e ka falatsa setjhaba sena kajeno, haeba e hopola hobane e ka se falatsa, mme yona ya itshireletsa. Sefe feela sa ditjhabana tseo se ka e etsa. Empa, di a tshaba, hoba di a tseba lefatshe lena le ke ke la tiisetsa mopotolohong wa lona tlasa maemo ao.

<sup>95</sup> Ka hona, lefatshe le a tseba mahlaba a lona a pelehi a maholo hona, le tlameha ho sutha. Tswalo e ntjha e tla fihla, ho tswalwa, e atametse. Ke lebohela hoo. Ke kgathetse ke ena. Mang—mang le mang wa tseba hore—hore mona ke nqalo ya lefu le hlomoho, le dikgohlano tsa mefuta, le tse jwalo. Ke thabetse ha le tlatlameha ho sutha. Ke thabetse ha nako eo e atametse. Jwaleka Johanne wa kgale, a boletse, “Leha ho le jwalo, tloo, Morena Jesu.”

<sup>96</sup> Jwale, le tshwanetse ho bola, ehlide, kamoo ke boletseng, ho lhahisa tswalo e ntjha. Shebang moo le bolletseng teng. Lemohang, baena beso! Le bodile ka botlalo. Dipolotiki tsa lona le ditsamaiso di bodile kamoo di ka kgonang. Ha ho lesapo le itekanetseng ho lona, ditsamaisong tsa lona tsa lefatshe, dipolotiki tsa lona le dipolotiki tsa borapedi ba lona, le sohle seo le leng sona. E mong o re, “Ke Modemokrate. Ke Morephaboliki. Ke Methodise. Ke Baptise.” Kgele, ntho yohle e bodile ho fihla mokong. Ntho e nngwe e tlameha ho sutha. Le ke ke la tiya. Leha o ka emisa George Washington kapa Abraham Lincoln lebatoweng ka leng la Dinaha tse Kopaneng, le sa ntse le sa tlo kgutla. Le tshetse moedi wa topollo.

<sup>97</sup> Ntho e ka le thusang e nngwe feela, ke ho Kgutla ha Mmopi. Amen.

<sup>98</sup> Le a tseba le tshwanelo ho feta. Le mahlabeng le tsielehong. E mong ha a tsebe a ka etsang. E mong o sheba ka nqa *ena*, le e mong ka nqa *yane*, le ntho yohle. E mong o tshohile e mong. E mong o leka ho betla ntho e tla timetsa *enwa*. *Enwa* o leka ho hanyetsa *yane*, ho timetsa e mong. Ho fihlela, jwale e wetse matsohong a banna ba tletseng sebe, ba ka timetsang lefatshe ka nako ya metsotso e mehlano. Wa bona? Ha ho le jwalo le a tseba le ke ke la e tiisetsa. Batho ba tseba le ke ke la e mamella. Mme lefatshe le a tseba ba tlilo e etsa, e tlilo etsahala.

<sup>99</sup> Hoba, Modimo o itsalo. “Mahodimo wohle le lefatshe di tla tuka.” Ntho yohle e tla hlanamiswa botjha, ho tle ho tswalwe lefatshe le letjha. Modimo o e porofetile.

<sup>100</sup> Le bodile, ditsamaiso tsa lona tsohle, mme le tlameha ho etsa jwalo, ho bola.

<sup>101</sup> Ke ka baka leo lona, ke itseng, le tshohile hoo sefahleho sa lona se tlerefetseng, mme le ferekane. Mme ditshisinyeho tsa lefatshe, di hohle, le di hodimo-le-tlase lebopong. Le maqhubbu a kgorohang Alaska, mme a kgohlopa hodimo-le-tlase lebopong, ka baka la ditshisinyeho tsa lefatshe le dintho. Mme batho ba ngola, “Na re ka falla ho yona? Na re ka falla ho yona?” Wa bona? Ha ba tsebe ba etseng. Nqalo ya polokeho ha e yo haese e le Nngwe, ke Kreste, Mora Modimo o phelang. Mme e nngwe feela nqalo ya polokeho, mme ke Yena. Bohle ba leng ka ntle ho Seo ba tlilo timela, ruri jwaleka Modimo ha o boletse.

<sup>102</sup> Jwale ha re shebeng Buka ya Ngaka, efela haeba le kene maemong a mofuta oo, mme re bone haeba sena se tlameha ho etsahala mohla ho tswalwang lefatshe le letjha. Mattheu 24, Bukeng ya Ngaka, e leng Bibebe, mme re shebe se porofetilweng, matshwao a lona e tla ba afe.

<sup>103</sup> Jwale, efela ha ngaka e tseba matshwao a tswalo ya ngwana... Mme ereha ngwana a le mothating wa ho hlaha, o hlophisa thepa yohle, hobane o tseba e-e le nako ya tswalo ya ngwana. Hobane, matshwao wohle a supa; e-e metsi a pshatlehile, madi. Mme jwale e... Nako e fihlile. Ngwana o a sihlolwa, mme ke nako ya tswalo ya ngwana. Mme o le hlophisetra ntho ka nngwe ke hona.

<sup>104</sup> Jwale, Jesu o re boleletse se tla etsahala ka nepahalo feela nakong ena. O re boleletse, ho Mattheu 24, hore Kereke, Kereke ya sebele, le kereke e nngwe, di tla ba... Kereke ya hlaho, Kereke ya moyo, “Di tla bapa hona, balekisi, hoo e ka thetsang le bona Bakgethwa, hola ke ntho e ka etswang.” Jwaloka matsatsing a Nowe, “Kamoo ba neng ba e ja, ba e nwa, ba nyala, ba ineetse lenyalong,” le boitshwaro bona bohole bo hlephileng re bo bonang lefatsheng kajeno. Bibebe, Buka,

Buka ya Ngaka e boletse sena se tla hlaha. Ka baka leo, ha re bona ho etsahala sena, re a tseba tswalo e atametse. E tlamehile jwalo. E, monghadi. Jwale, re sheba seo, re—re le setjhaba; e seng re le setjhaba, empa lefatshe.

<sup>105</sup> Jwale, Israele, kereke, ha re qaleng morao ka yona metsotso e mmalwa. Mme re e sale morao metsotso e leshome e latelang, ha ho ka etswa. Israele e ne e tewa ke mahlaba a pelehi tlasa moporofeta e mong le e mong ya ttileng lefatsheng. Ya kgahlolwa ke mahlaba a pelehi a Molaetsa wa hae. Hoba o ile a etsang? Moporofeta o ne a tshwere Lentswe. Mme—mme yona e itjaletse bobodu bo bongata mme ya rala ditaelo tse ngata tsa tsamasio bothong ya yona, ho fihlela moporofeta enwa a kgohlopha motheo wa yona. Ba ne ba hlouwe ke mang le mang. Ka baka leo, ha ho le jwalo, Modimo ha o roma moporofeta, kereke ka boyona e ne e dihelwa mahlabeng a pelehi. Hobane, moporofeta, “Lentswe la Morena le tla ho moporofeta, yena a le mong.” Ke ho re, Lentswe le bolellwang letsatsi leo le bonahatswa ke moporofeta wa mongwaha oo, esale ho le jwalo. Mme, dikereke, di haha ditsamaiso tse ngata hakana tse teelang Lentswe hare, ho fihlela a kgohlopha motheo wa kwetjeko ya yona ha a fihla. E ne e tshwarwa ke mahlaba a pelehi.

<sup>106</sup> E ne e le eng? Morao Lentsweng! Morao Bophelong! Ditsamaiso ha di na Bophelo. Lentswe la Modimo ke lona feela le hlahisang Bophelo. Ditsamaiso tse hahilweng di Le teetse hare, teng ha di Bophelo. Lentswe ke lona le hlahisang Bophelo. Molaetsa wa hae o ne o kolokotehisa masalla o a kgutlisetsa Lentsweng. Sehlotschwana se a tswa mme se a dumela. Ka dinako tse ding, e ka ba...Mehleng ya Nowe, batho ba ka bang robedi feela. Empa, leha ho le jwalo, Modimo wa kolokotehisa masalla. Mme, wa timetsa, ntho tse ding tsohle tsa tlameha ho kolokoteha di sutha.

<sup>107</sup> E sebeditse jwalo, ho theoha hohle le mengwaha, qetellong kereke ya ba hlahisetsa Ngwana e Motona, mme Ngwana e Motona eo e le Lentswe, ka Bolona, le entsweng nama. “Lentswe le ne le le tshimolohong, mme Lentswe le ne le le ho Modimo, mme Lentswe e ne e le Modimo. Mme Lentswe le ne le etswe nama la aha hara rona.” O hlotse diabolosi e mong le e mong, matla wohle hodima lefatshe, a emeng kgahlano le Yena, ka Lentswe la Ntate feela. Teko ka nngwe eo Satane a Mo neileng yona, O kgelemme Satane; e seng ka matla a Hae—Hae ka Boyena A a ruileng, empa ka Lentswe la Modimo. “Ho ngodilwe... Ho ngodilwe... Ho ngodilwe...” Hobane E ne e le Lentswe.

<sup>108</sup> Mohla Satane a ne a fofa a pharumela Eva, e ne e se Lentswe, ka baka leo ya hlolleha. Mohla a ne a pharumela Moshe, ho bile jwalo. Empa mohla a kgahlanang le Mora

Modimo, keha E le divoloto tse dikete tse leshome. Tsa mo hlotha masiba a lokotsehang, mohla A ne a kgutla mme a re, "Ho ngodilwe, 'Motho a ke ke a phela ke bohobe feela, le ka Lentswe le leng le le leng le tswang molomong wa Modimo.'" Ke eo Ngwana e Motona eo, ya entsweng nama. Lentswe la Modimo la Bosafeleng, ka Boyena, le ne le bonahaditswe ka mmele wa nama mona hodima lefatshe, ho bapisa Lentswe.

<sup>109</sup> O tsebile se dutseng dipelong tsa bona ka tsela eo. O kgonne jwalo ho bolella Filipi moo a na a le teng, hore e ne e le mang. O kgonne ho bolella Simone Petrose e ne e le mang. A bolella mosadi sedibeng. Hobaneng? E ne e le Lentswe. Hantle. Bibele e boletse, ho Baheberu kgaolo ya 4, "Lentswe la Modimo le bohale, le matla ho feta sabole e leoditsweng ka nqa tse pedi, le hlabo le ho fihla mokong wa lesapo, mme ke Mosenodi wa maikutlo le wa mehopolo ya pelo."

<sup>110</sup> Kgele, difofu tseo tsa baprista tsa Mofarisi di sitilwe ho bona hoba Leo ke Lentswe le bonahetseng, hoba ba itharile ka boprista le ka tsamaiso. Mme tsamaiso ya kgale ya tlameha ho sutha. E ne e le Lentswe, empa se kileng sa tshepiswa se ne se phethilwe. Ka baka leo haeba se phethilwe, se tlameha ho bola. Ke lekgapetla. Peo yona e tswetse pele.

<sup>111</sup> Moshe a ke ke a tlisa molaetsa wa Nowe. Le jwalo Jesu a ke ke a tlisa Molaetsa wa Nowe, hoba e ne e le mongwaha o mong. Mme peo ya kgale e ne e lokile, empa e sebeditse e qetile morero wa yona mme e shwele ebile e fetile. Ke phetoho e tlohang nthong ya kgale ho fetela ho e ntjha, moo Bophelo bo neng bo ahile teng, ke sona se neng se tshwenya batho, ke sona se ba tshwenyang kajeno.

<sup>112</sup> Ha re ahe lerako, jwaleka ha re qala ka molaetsa wa Luthere, ho theoha ka mola o otlolohileng, kapa molaetsa wa Pentekosta. Hantle. Re ntse re etsa methinya. Re haha moahao. Lentswe la Modimo ke moral o tiileng. Mang le mang a ka rala mola o otlolohileng, empa ho hlokwa sehabi ho ja mothinya. Ho hlokwa matla a Modimo ho etsa seo. Ho hlokwa motlotsuwa ya tswang Lehodimong, ho theolwa ka morero wa ho etsa seo. Ho bile jwalo, mongwaheng ka mong. Le mongwaheng wa baporofeta, Lentswe la Morena le tla ka baporofeta bao, mme ke bona ba jang methinya eo, ba etsang phapang eo. Empa dihahi di ne di batlile ho haha lerako. Ha se lerako, ho hang. Ke moaho, moaho wa Modimo.

<sup>113</sup> Jwale, re a utlwa mme re tseba Hona e le Nnete, hore ditsamaiso di bodile mongwaheng o mong le o mong. Mme e nngwe le e nngwe ya ditsamaiso tsa bona ya tlameha ho bola le ho shwa, ho fihlela e llahisa Kereke eo. Ditshileng tse bodileng tseo ha tswa Lentswe, ka Bolona. "Lentswe la Morena le tla ho baporofeta." Ha le tle ho baprista; Le tla ho baporofeta.

<sup>114</sup> Mme le lemohe, ha Le etsa jwalo, qetellong Lentswe leo la tswalwa mona ka nama ya motho ka botlalo. Botlalo bohole ba Bomodimo bo ahile ho Yena ka mmele. E ne e le Lentswe. Baporofeta ke karolo ya Lentswe, Lentswe la mongwaha wa bona. Rona, kajeno, re karolo ya Lentswe, ba latelang Lentswe. Empa Yena e ne e le botlalo bohole ba Lentswe. E ne e le Lentswe. O itse... .

<sup>115</sup> Mohla ba ne ba Mo qosa, ka ho Iketsa ya lekanang le Modimo, hobane E ne e le Mora wa Modimo, ba itse ho Yena, "Be, O Iketsa Modimo."

<sup>116</sup> A re, "Ho ngodilwe melaong ya lona, ho thwe bao Lentswe la Modimo le tlileng ho bona le ba bitsa, 'medimo', baporofeta? Ath e ne e le yona. Le Nqosa ke'ng ha Ke re Ke Mora Modimo?"

<sup>117</sup> Etswe, botlalo bohole ba Bomodimo bo ne bo ahile ho Mora wa Modimo ka mmele. E ne e le ponahatso e tletseng ya Modimo. Qetellong ke yona ntho e... Mahlaba a pelehi tlasa baporofeta bao, kgele, bao e ne e le Lentswe, ba ne ba tshwantsha botlalo ba bona ka bobona, botlalo ba Lentswe. Mme qetellong ditsamaiso tsa eshwa, ho fihlela, "Lentswe le etswa nama mme le aha le rona."

<sup>118</sup> E shebeng kamoo e bapisitsweng ho Jakobo. E shebeng kamoo e bapisitsweng ho Josefa, ka nepahalo. A ratwa ke banab-... ntatae; a hlouwe ke ngwanabo, lebaka le le siyo. E le motho wa moyo, a kgona ho lepa dintho, le ho kwaholla ditoro. A ke ke a etsa letho haese ho ba ntho eo. O tswetswe jwalo. O ne a rerwepele ho ba jwalo. Empa, a hlouwe ke banababo, mme bofelong a rekiswa ka dikotwana tse mashome a mararo tsa silifera, dikotwana tse ka bang mashome a mararo. Mme o ne a nyollwe, a bewa letsohong le letona la Faro. Ha ho shebjwa chankaneng ya hae, ho ena le moqhatsetsi le moapehi; e mong a timela mme e mong a bolokeha.

<sup>119</sup> Jesu chankaneng ya Hae, sefapanong; e mong o timetse, e mong a bolokeha. Ka nepahalo. Mme a nto nyollelwaa mahodimong a dula fatshe Teroneng ya Modimo. Mme mohla A boelang a tloha, mohoo o tla tumiswa, "Hlabang ka lengole," mme leleme ka leng le tla bolela.

<sup>120</sup> Mme enereha Josefa a tloha teroneng mme a etswa, ho letswe terompeta, mme lengole ka leng le tlamehe ho kgumama. "Josefa o a tla."

<sup>121</sup> Le jwalo, tsatsi le leng Terompeta ya Modimo e tla lla, ba shwetseng ho Kreste ba tla tsoha, mme lengole ka leng le kgumame, le leleme ka leng le pake Lentswe la lena. Empa O tlela eng? Mona ebe O tlela'ng?

<sup>122</sup> Lemohang, o hlahisitse Lentswe lena le feletseng le kileng la etswa nama, tlasa mahlaba a pelehi a baporofeta ba kileng ba kgaruma, "O a tla! O a tla! O a tla!"

<sup>123</sup> Jwale, empa esale a hlokile moporofeta ka dilemo tse makgolo a mane, ho latela nalane le Lengolo, ho qala ka Malakia ho fihlela Johanne. Esale ba bolokile baithuti ba bodumedi, baprista, badisa. Jwale mona re ka ipotsa, ka ntle ho ntho eo, ebe maemo a tsamaiso ya bona e bodileng e ne e le afe, dilemo tse makgolo a mane ntle le Molaetsa o hlamaletseng, wa HO RIALO MORENA, ho tswa ho Modimo. Ka baka leo, baprista, baporofeta, le ba jwalo, ba ne ba qhauwe ditshileng tse tshabehang. E ne e bodile.

<sup>124</sup> Yaba Johanne, Elia ya tshepisitsweng wa Malakia 3, e seng Malakia 4. Malakia 3, hoba Jesu o buile jwalo ho—ho Mattheu kgaolo ya 11.

<sup>125</sup> Yareha leihlo la ntsu la Johanne le sirwa ke lelwapi, ke kgolwa e le buka ya Pember's ya *Mengwaha E Qalang* e tlalehang jwalo. Mme o itse, “Eyং le Mo botse haeba E le Yena, kapa na re sa lebeletse e mong.” Wa bona?

<sup>126</sup> Mme A re, Jesu, hoba a kgutlise barutuwa ba hae, hoba a ba laele ho dula kopanong le ho shebella se etsahetseng. “Mme eyang, le bontshe Johanne dintho tsena. Mme ho lehlohonolo ya sa kgotjweng.”

<sup>127</sup> Yaba O retoloha a sheba barutwa ba Hae le batho bao A buisanang le bona. A re, “Le ne le ile ho bona’ng mohla le tswileng ho bona Johanne?” A re, “Ana le ne le tswile ho bona monna ya apereng dikobo tse bonojana?” Mme A re, “Ke re ho lona, ba jwalo ba dula matlung a marena.” A re, “Ana le ne le tswile ho bona e—e—e lehlaka le tsukutlwang ke moya?”

<sup>128</sup> Ka mantswe a mang, nthwana efe e fihlang, o tsukutlwang ke yona? “Ke tla le bolella, ha o ka tla ngodisa sehlopheng sa rona, re tla o lefa moputso o nonneng.” E seng Johanne. “Ha o ka lesa ho nna o rera kgahlano le *sena* le *sane*, be, o ka imatahanya le dihlopha tsa rona.” E seng Johanne.

<sup>129</sup> Ho re, “Ebe le ne le tswile ho bona’ng, moporofeta? Mme Ke re ho lona, ke ya fetisang le moporofeta. Ha le ka e amohela, ke yena ya boletseng ke moporofeta, ya itseng, ‘Ke roma lenqosa la Ka pela sefahleho sa Ka, ho hleka mmila.’” Eo ke Malakia 3:1.

<sup>130</sup> E seng Malakia 4, lekgale. Hoo ho fapanie. Hobane, mohla Elia eo a fihlang, lefatshe le tla tjheswa kapele, mme ba lokileng ba tla tsamaya hodima melora ya bakgopo.

<sup>131</sup> Jwale, lemohang. Molaetsa wa hae o sitilwe ho ba tsosa borokong ba bona ba bokereke. Ba mpa ba re, “Lehlanya la monna le teng tlase mane. Le mo fete mohwalotso, kapele. O itlalehile a hlanya; o ntse a leka ho qwedisa batho metsing tlase mane. Wa bona? Kgele ha ho letho ho monna eo wa kgale. Kgele, ha a apara le diaparo tse tshwanetseng. O itlamile ka letlalo la nku. Be, o futsanehile sa kalakunu ya Jobo. Kgele,

o tswa sekolong sefe sa thupelo? O tshwere setlankana sefe sa botho? Ha re ka ke ra sebetsa mmoho dikopanong tsa hae. Re tla mo lesa a dutse mono di be di omelle.” Wa bona? Lefatshe ha le eso fetohe hakaalo, esita le tsona ditsamaiso. Uh-huh. “Empa re tla mo tlohela a dule tlase mono. Ebile ha a na le...”

<sup>132</sup> Le a tseba hobaneng a sa etsa hoo? Hopolang, ntatae e ne e le moprista. Empa hobaneng a sa latela tsela ya ntatae, etswe e le tlwaelo ya bana tshiung tseo? Hoba a ne a tshwere ntho e nngwe, Molaetsa o moholwanyane ho feta. A tla tsebahatsa Messia, hoba Moya o Halalelang o ne o boletse. Masalla ao a kgutlisitsweng ke Molaetsa wa Gabariele, tlase mono, a tsebile ho tla ba jwalo. Ka hona re a bolellwa, mohla dilemo tsa hae di leng robong, a kena lefeelleng. Hoba ntatae le mme ba timele, a kena lefeelleng, hoba a tlamehile ho utlwa ka tshwanelo.

<sup>133</sup> Hobane, ka hara moahohadi oo wa thutamodimo mono, ba ka be ba itse, “Jwale, ke a tseba eka ke wena ya loketseng ho tumisa Messia. Esaia o tlalehile ho fihla ha hao, ka hona o tliro ba lentswe leo. Jwale, na ha o hopole Moena Jones mona a e na le ditshwanelo tseo hantle?” Mme ebe o qobellwa habonolo.

<sup>134</sup> Empa ha a ka a ithuta ditsamaiso dife feela tsa bona. Molaetsa wa hae o ne o le hlokolosi haholo. A tswa a kena lefeelleng, ho dula teng.

<sup>135</sup> Le lemohe. Molaetsa wa hae o ne o sa tshwane le wa mothuti wa bodumedi. O ne a sebedisa dipapiso. O itse, “Oh, lona madinyane a dinoha.” A bitsa tshebeletso eo ya bodisa, “dinoha.” Sena, e nngwe ya dintho tse kgopo tseo a di fumaneng lefeelleng, e nngwe ya dintho tse tswedikanang, e le dinoha. Mme a nahana, “E batla e le papiso e kgabane eo ke e tsebang.” A re, “Madinyane a marabe, le tshositswe ke mang ho balehela bohale bo tlango? Le se ke la re, ‘Rona re maloko a *sena le sane*,’ hoba Modimo o tseba ruri ho tsosetsa Abraham a bana le ka majwe ana.” “Majwe ana,” seo a se fumaneng lefeelleng lebopong la molatswana.

<sup>136</sup> “Hape selepe,” seo a se sebedisitseng lefeelleng, “se beilwe motsong wa sefate,” seo a se boneng lefeelleng. “Sefate ka seng se sa beheng tholwana e monate,” o tsebile moo a fumaneng dibeso tsa hae tsa patsi, wa bona, “se a rengwa se lahlelwaa mollong,” se etswa dibeso. Wa bona? Molaetsa wa hae e ne e se moruti, ho hang. O ne a sala hlaho morao, lefeelleng.

<sup>137</sup> Empa o ne a tshwere Molaetsa a tlamehang ho o tumisa, mme a ba le tumelo Molaetseng wa hae, ho re, “Messia eo, eka kgona a fihle, mme, le jwale, O hara lona hantle hona jwale. Ke re ho lona, e Mong o eme hara lona, eo le sa mo tsebeng, Eo ke sa lokelang le ho jara dieta tsa hae. O tla le kolobetsa ka Moya o Halalelang le Mollo.”

“Ke mang, Johanne?”

“Ha ke tsebe.”

<sup>138</sup> Empa ka letsatsi le leng, ha tla Monna a tsamaya a tobile noka, Monna ya tjhebeho e tlwaelehileng. Feela hara e... Johanne Mokolobetsi wa kgale keha a eme mono, moporofeta ya bokwang, yaba o sheba mose wa ho Jordane. A re, “Bonang, ke eo Konyana ya Modimo e tlosang sebe sa lefatshe.”

“O Mo tseba jwang, Johanne?”

<sup>139</sup> “Yena lefeelleng, ya ntaetseng ho ya kolobetsa ka metsi, o itse, ‘Eo o tla bona Moya o theohela hodima Hae, ke Yena Ya tla kolobetsa ka Moya o Halalelang.’”

<sup>140</sup> Molaetsa wa hae o ke ke wa tswa ntlhakemong ya thutabomodimo kapa tsamaisong ya tumelo e entsweng ke motho. O tlamehile ho tswa ho Modimo ka kotloloho.

<sup>141</sup> Hoba, Molaetsa wa hae ha o a kgona ho ba kgohlopa ha kaalo. Ba ile ba nahana, “Oh, o itse o bone ntho Eo. Ke e belaela haholo. Nna ha ke a bona letho. Ke ile ka sheba. Oh, kgidi! Ha ke a bona letho ka yona,” ho itsalo baprista le bao.

<sup>142</sup> Empa yena o Le bone, mme jwale re a tseba hobane o Le bone. Ehlide, o kgonne. Empa na le a eellwa o fumaneng?

<sup>143</sup> Ha O a kgona ho ba fuduha borokong ba bona. Ba ile ba tswelapele hantle, ba kgaola hlooho ya hae, ka ho tshwana. Empa ha e—e a ka ya ba fuduha.

<sup>144</sup> Empa o ile wa tshwasa masalla, ba neng ba ruile Bophelo ka ho bona, sehlotschwana seo, Ann le—le Simeone, le ba mmalwa bao ba neng ba emetse ho Tla ha Morena ka hohle. Mme Anna, ka tempeleleng, a foufetse, moporofeta ya sebeleditseng Morena ka dithapelo. Mme yaba tsatsi le leng hoba a haptjwe ke Moya...

<sup>145</sup> Mme Simeone o ne a porofetile a boletse, monna ya hodileng, a itse, “Moya o Halalelang o mpoleletse ke sa tlo bona lefu pele ke bona Kreste wa Morena.”

<sup>146</sup> Kgele, baprista ba bang, wa tseba, ha thwe, “Thaka leo la kgale, o se a batla a hlakane, wa tseba. Kgele, o hatile lebitleng ka leoto le leng jwale, mme le leng le a kgiritsa. Kgele, mo tloheleng. Esale e le leqheku le hlomphehang. Empa o batla a...”

<sup>147</sup> Empa, wa bona, o ne a tshwereng? O ne a senoletswe ke Moya o Halalelang.

<sup>148</sup> Ke yona ntho e senoletsweng lona batho thapama ena. Moya o Halalelang o le tlisitse mona ka sepheo. Lona... Moya o Halalelang! Shebang baprista bana le tshebeletso ena ya bodisa mona ho tswa ho Methodist, Baptist, Katolike, le tsohle. Ba susumeditse ke Moya o Halalelang. Hora e fihilie. Ha ho le jwalo Moya o Halalelang o tsamaile hodima bona, mme esale ba E lebeletse, ba lapile. Yaba, feela nthwaneng...

<sup>149</sup> Ka tsatsi le leng, wa tseba, thelebishene e ne e le siyo. Ke leboha Morena ka letsatsi leo.

<sup>150</sup> Ka hona, bao, ba ne ba dutse tlase mosikong wa maralla a Judea. Yaba teng ho tswalwa e—e Lesea. Naledi ya hlaha, le dintho tse jwalo.

<sup>151</sup> Empa hoba ho fete matsatsi a robedi, mme a tlisa Lesea, le phuthetswe ka masela. Ke masela a sosobaneng. Ho thwe...ha ke bolellwa e ne e le... Ba se na letho ho mo apesa. E le e—e lesela la kgale la joko ya pholo, ha ke bolellwa, e le lona lesela la Hae. Ke mona ho fihla Josefa le bao, ba e tla ba kena ka Lesea lena.

<sup>152</sup> Ke kgolwa bomme ba ile ba emella thokwana, le masea a bona ka meroko le ntho tsohle. Ho re, “Shebang mane. Wa bona? Wa bona? Ke yena eo. Wa bona? O emarisitswe ke monna yane. Ke eo a kena. Hoo, le tsamaele hole le yena. Emellang thoko.” Ba sa ntse ba nahana jwalo.

<sup>153</sup> Empa, Maria, o ne a sikile leo Lesea diphakeng tsa hae, a sa tsotelle seo ba se nahanan. O tsebile hore e ne e le Mora Mang.

<sup>154</sup> Mme ho dutse ho le jwalo le ka modumedi ka mong ya amohelang Lentswe la Modimo pelong tsa bona! Ha ke tsotelle ditsamaiso di reng. O tseba seo Le leng sona. Ke tshepiso ya Modimo. O e senoletswe ke Moya o Halalelang, mohla o no o kgurumetswa ke Matla a Hae. O tseba moo E leng teng teng. Ha ho mang ya nang le tokelo ya ho bolela Evangeli pele a kopana le Modimo motsheo lehwatatem sehlahleng se tukileng, moo ho seng tsamaiso ya bodisa lefatsheng e ka Le hlalosetsang hole le wena. O ne o le teng mono. E etsahetse ho wena. Ha ke tsotelle ditsamaiso di reng. O paki ya yona. Alleluia! Ke ikutlwajwaleka leqheku leo ke buileng ka lona la monna wa bammala, “Ha ke na sebaka se lekaneng hodimo mona jwale.” Wa bona? Ke ikutlwajwaleka hehalalela haholo hona jwale, ha ke nahana. Mme e nepahetse. Modimo, ka Boyena, o senoletswe yona.

<sup>155</sup> Simeone o ne o tshwere tshepiso. A dutse phaposing ya hae ya ho bala hoseng hoo, oh, ke kgolwa ho ne ho kena makgolo a mmalwa a masea, hoseng ho hong le ho hong. E le Bajuda ba ka etsang dimilione tse pedi le le halofo naheng, mme masea ana a tliswa, mme ho tswetswe a mangata. Mme a tlamehile ho tla letsatsi ka leng la borobedi, ho hlahisa nyehelo ya hlatsuo. Mme jwale ke mona ho e tla... Simeone, a dutse mono, wa tseba, mohlomong a ntse a bala lengolo la Esaia. Ha ke tsebe. Empa hang feela...

<sup>156</sup> Jwale, ha Moya o Halalelang o tshepisitse, Moya o Halalelang o tlameha ho boloka tshepiso eo, haeba efela E le Modimo ruri. Yena, haeba A...

<sup>157</sup> Ha motho a fihla a bolela taba, Modimo a sa e tshehetse, ha se Lengolo, le ho qaleng. E lebale. Mme haeba a e tlaleha jwalo, mme le jwale Modimo a sa e tshehetse, e sa ntse e fosahetse.

<sup>158</sup> Hobane, Modimo o toloka Molaetsa wa Hae. Ke toloko ya Hae ka Boyena. Ha seo a se buang se hlaha, Modimo o itse, “Mo utlweng, hoba ke Nnete.” Ke kelello e pala feela eo. Haeba a re e a etsahala, mme e etsahala, ke yona ntho e bolelang. E tshwanetse jwalo ka mehla, e be Nnete hantle, hoba Modimo ha o bue mashano.

<sup>159</sup> Mme Simeone ke enwa o dutse mono, o ntse a tlatlapuwa. E ne e le masalla. O ne a utlwile Johanne, le masalla a manyenyane a letsatsi leo. Mme ke enwa o dutse mono, a mametse lengolo lena le phuthilweng, a ntse a tseba. Ke bolela, o tsebile hobane Johanne o a tla, hobane e—e ne e le karolo ya masalla. Lentswe le ne le senoletswe yena. Mme hang feela, eitse Lesea leo ha le kena tempeleng, ya eba tshwanelo ya Moya o Halalelang ho senola hore Le teng mono. Ka hona yena, a tsamaiswa ke Moya, a tswa phaposing ya ho bala, a theoha ka holo hantle, a fihla moleng oo wa basadi. A tla jwalo a ntse a theosa ka mola oo wa basadi a ba a fihla moo Lesea lena le leng teng, leo bohole ba emeng thoko le lona. A phahamisa Lesea matsohong a hae, ho re, “Morena, lesa mohlanka wa Hao a ikele ka kgotso, hobane mahlo a ka a bone poloko ya Hao.”

<sup>160</sup> Mme nakong yona eo, e mong wa bakgethwa ba banyenyane ba letsatsi leo, e leng Anna, moporofeta wa mosadi. Yena a dutse mono, a foufetse, khoneng. A ema, a foufetse. Ke enwa a e tla, a tsamaiswa ke Moya, hara basadi bohole le batho ba phuthehileng ka hare le ka ntle ho tempele, a ba a fihla moo Ngwana Kreste a ne a le teng.

<sup>161</sup> Efela ha Moya o Halalelang o kgona ho tataisetsa mosadi wa sefolu ho Yena, ho ka thweng ka sehlopha sa Pentekosta seo ho thweng se ntse se bona? Nke ke ka tswela pejana. Wa tseba, ho tloha moo ho ya pejana. Lemohang. Oh, kgidi! Kamoo kereke eo e tlamehileng e be e ne e kene ditshileng tse tshabehang hape, ruri e ne e tlamehile jwalo, letsatsing leo! Empa ya reketlisa masalla a manyenyane, jwaleka ha ke boletse.

<sup>162</sup> Jwale ha re tshephaleng. Efela ha re bona kereke eo e kene maemong ao kajeno, na ha re a fihla nakong eo hape? [Phutheho e re, “Amen.”—Mong.] Jwale le shebe dintho tsa tshepiso, ya Bibele, tse tla hlahela ka hara kereke nakong ena. Re bona se etsahalang lefatsheng, mme re a bona le fihlike bofelong ba lona. Jwale ha re shebeng ka hara kereke.

<sup>163</sup> Yona, kereke, e kile ya tshwarwa ke mahlaba a pelehi tlasa Luther. Jwale, re a tseba ho na le mengwaha e supileng ya kereke, le baromuwa ba supileng ba mengwaha eo ya kereke, ho latela Ditshenolo. Jwale, mohla Luther a ne a tshwanelo ho hlahella, ehlide ya dihela kereke lehlabeng la pelehi, empa ya hlahisa Luther. Ke hantle.

<sup>164</sup> Ka mora moo, ya boela ya kena mathateng, ka hona ya hlahisa Wesley. Ke hantle.

Ho tswela pele hape, mme ya hlahisa pentekosta.

<sup>165</sup> Moromuwa e mong le e mong wa mongwaha wa bona, o ile a kgohlopha yona... ho kgutlela Lentsweng, Molaetsa wa mongwaha wa bona, Molaetsa ho latela Bibebe. Ke tshwere ntho e tla latela, buka, e tla tswa e amana le hoo, kaletso ya dikgaolo tse nne tse qalang tsa Tshenolo. E baleng, hang ha re e hatisa. Mme e kgodisa, ntla le pelaelo, seo Molaetsa wa Luther o bileng sona, tokafatso; seo kgalaletsso e leng sona, kgato e latelang tswalong ya hlaho. Mme ho ntso latela mapentekosta, ka nepo.

<sup>166</sup> Jwale, lemohang, mongwaha ka mong o ne o kgohlopha kereke mme wa e tshwarisa mahlaba a pelehi. Empa ba etsang? Hoba mahlaba a pelehi a fihle, ho ena le ho tswelapele ka Lentswe, ba kgobokanya sehlopha sa banna se ka wa pele a entse. Ke yona hantle. Hantle ka mora hoba baapostola ba kgohlope, re e fumana e boela e fapoha. Ebe moo re fumanang, ho latela ba bang ba bangata, Agabuse le bahlabolli ba bangata ba baholo morao qalong. Mongwaha o mong le mong o sebeditse, ha le ntse le bala Lekgotla La Pele La Nicaea, Botate Ba Nicaea, le tsohle morao. Le e fumana yohle ka hare ka mono. Mongwaha ka mong o ile wa kgohlopheha, nako le nako ha moromua a tla ka HO RIALO MORENA.

<sup>167</sup> Jwale le lekgatheng le lebe ho fetisa, hono, ho latela Lengolo, leo le kileng la kena ho lona. Re mongwaheng wa kereke ya Laodisea, “O ruileng, empa e le mongwaha wa kereke e sefoufou, e sa tsebeng.”

<sup>168</sup> Ka hara Bibebe ha ho moo Kreste a kileng a ntshetswa ka ntla ho kereke, haese mongwaha wa Laodisea. E mongwaheng o mobe ka ho fetisa. E eme e bodile ho feta ka moo e kileng ya etsa. Ho re, “Ke dutse jwaleka mofumahadi, ha ke hloke letho.”

<sup>169</sup> “Mme ha o tsebe hobane o feelsa, o madimabe, o sefoufou, o mofutsana, mme ha o tsebe.” E, monghadi. Ho re, “Ke o eletsa, ho tla ithekela ho Nna setlolo sa mahlo, Ke tle ke tutubolle mahlo a hao.” Mme hoo ho tla—ho tla hle... Ruri setlolo sa Modimo sa mahlo se tla tjhabisetsa kereke Lesedi haeba e batla ho bulela seo Modimo a se buileng mahlo a yona.

<sup>170</sup> Lemohang, ka potlako jwale. Jwale, e lekgatheng leo, ha ho seriti sa pelaelo. Re mongwaheng wa kereke ya Laodisea.

<sup>171</sup> Jwale, moromuwa wa Yona o tshepisitswe, ho Malakia kgaolo ya 4. O tshepisitswe ho e etsa. Mme Molaetsa o tlamehile ho kgutlisa Lentswe, ho busetsa batho Lentsweng. Tswalo e tlameha ho fihla. E tlameha ho lokollwa, ka Tswalo e ntjha, ho tswa ho latela Malakia 4.

<sup>172</sup> Kerekeng ya lefatshe kajeno, ho sebetsa ditsamaiso tse pedi. Jwale le mamele ka kelohloko. Jwale ke batla ho bona le tla re “amen” tabeng ena. Kajeno kahara kereke ya lefatshe ho sebetsa ditsamaiso tse pedi. Ke tlilo hlohlolla taba ena lehetleng la ka, mme ke tla be ke qetile ka yona. Bohle re a tseba leo ke Lentswe la Modimo, le tsamaiso ya bodumedi. Ho sebetsa ditsamaiso tse pedi. Jwaleka ha di entse, Jakobo le Esau; e mong wa Moya, e mong wa nama. Mme keng? Esau le Jakobo ba ne ba lwana kahara dipopelo tsa mme, esita le ho fihla mohla ba tswalwang. Mme ho jwalo le ka ditsmaiso tsa bodumedi le Lentswe, di a lwana, di a lwantshana. Ha esale, ho qala mohla Luther a hlahisang hlabollo ya pele. Ke kgolwa e le bonolo hoo le ka e utlwisisang. Wa bona?

<sup>173</sup> Banna bana, ha ba ka thonaka ntho *Ena* mme ba tswa ka Yona, ba ka nontsha moelelo wa Yona ho feta, wa bona, ho E fihlisa moo le ka kgonang. Ke mpa ke batla ho jala Peo ena, mme ke a tshepa ba tla E kenyetsa Bophelo. Lemohang. Wa bona?

<sup>174</sup> Esale ho le jwalo. Ke ka hona a tshwerweng ke mahlaba a pelehi, hoba ka ho yena ntwa e lwana.

<sup>175</sup> Esau ke eo, monna wa lefatshe feela, o tletse borapedi. Mme, oh, o itoketse, mothaka ya lokileng, o hlwekile, mekgwa e metle, kamoo ke tsebang, empa ha a tsebe letho ka tokelo eo ya Tswalo. O hlahile a le jwalo. O bopilwe jwalo.

<sup>176</sup> Mme Jakobo, ha ke tsotelle seo a leng sona, o batla tokelo eo ya Tswalo. Ke yena motho wa moyo.

<sup>177</sup> Mme bobedi boo, kajeno, bo bobile kahara polelo ya kereke. Ba ntse ba leka ho bopa tsamaiso ya tonana, e bitswa Lekgotla la Dikereke tsa Lefatshe. Mme ka popelong ya kereke ho tswa bana ba babedi. Le tshwaye mantswe a ka. Lefatshe le a . . .

<sup>178</sup> Lentswe le tlamehile ho tswala Kereke Monyaduwa wa Lentswe. Kereke e tlamehile ho ntshwa ho yena, Monyaduwa wa Kreste. Bao ba ithobaletseng mengwaheng yohle ba tla bopa Monyaduwa ya tswileng ka Lentswe leo ba tswileng ka lona, jwaloka ka ho qala maotong a hao ho ya hloohong ya hao. O a fetoha—fetoha ke ntho e kgolvanyane, mme o tlameha ho fumana ntho e feta-fetang, le jwalo. Ka nako ha mmele o ntse o hola, le Mmele wa Kreste o hola jwalo. Mme qetellong Hlooho e tla ho Wona, Hlooho ya Wona wohle, jwale, ha re ka lemoha, hobane ntho yohle E—E hokantswe le Hlooho. Hlooho ke yona e thinyang, e hulang.

<sup>179</sup> Empa ditsamaiso tsena di ke ke tsa hola di tswa Mono, hobane ke tsamaiso, mme e e sitwa ho hlahisa. Tshehlo e sitwa ho hlahisa ngata ya koro. Leha bobedi bo le tshimong e le nngwe, di nosetswa ka metsi a le mang, le lehlasedi la letsatsi.

E nngwe ke Lentswe; e nngwe ha se Lentswe. Mme bobedi boo bo a lwantshana. Esale di lwana ho tloha hlabollang ya pele, mme di sa lwana le jwale.

<sup>180</sup> Jwale, ha ke a tlameha ho tswelapele ka taba eo, na ke tlamehile? Ruri le tseba seo ke buang ka sona. [Phutheho e re, “Amen.”—Mong.] E, monghadi. Ke rona bao. Ke moo, tsamaiso. Ebe wena o kahara tsamaiso efe?

<sup>181</sup> Nahanang jwale, hola wa phela morao matsatsing a mang, tlasa kgahlapetso ya baporofeta ba Modimo le Mantswe a neng a tle, o ka be o batlile ho ema lehlakoreng lefe morao mono?

<sup>182</sup> Be, le kajeno o sa fuwe kgetho yona eo. O ntse a itokisetsa ho hlahisa Lentswe le phethahetseng morao mono, mme Lentswe le tlela Monyaduwa wa Lentswe. Jwale ka-ka ha mosadi e le karolo ya monna, o nkilwe ho yena, Kereke le yona eka kgona e be Kereke e dulang Lentsweng, Lentsweng ka leng la Bibebe; ha ho ditsamaiso, ditshomo, kapa le letho le eketswang ho Lona. Eka kgona e be e sa silafatswang, e se nang sekodi, Lentswe le sa angwang. Hantle.

<sup>183</sup> Mme matsatsing a Lesedi la Luther, mohla ho tinketswang diboutu tsa kereke, matla a Luther. E ile ya kena tlasa mahlaba, empa a tswa, “Ba lokileng ba tla phela ka tumelo. Mme ntho *ena* ha se selallo.”

<sup>184</sup> Jwale, re a fumana, hore, tlasa matsatsi a John Wesley, e kgahlotswe ke mahlaba hape, empa ha tswa—ha tswalwa Wesley. Empa a etsang? A kgutlela teng jwaleka mme ha a entse.

<sup>185</sup> Ya eba tlasa matsatsi a mapentekosta, bontata lona le bomma lona ba tswile tlasa ntho eo mme ba e hloya. Ba tswela seterateng, mme wa hao a sa rwala dikausi, a tiletsa kotikoti ya kgale, mme a bua ka kolobetso ya Moya o Halalelang, le ka katara ya kgale. Ba ne ba robala seporong sa terene, ba dula chankaneng bosiu bohole. Mme re hwamme seteiseleng hona, mme re kgutlela mokgatlong mme ra ikenya hlekehlekeng yona eo. Ba huletse bana ba bona hara tseo ba tswileng ho tsona. Ba ka phethoha lebitleng la bona. Ba ka le swabela. Ke a tseba e thata, empa ke Nnete. [Phutheho e re, “Amen.”—Mong.]

<sup>186</sup> O re, “Ha ke a re o rata batho.” Haeba lerato e se tokiso, o ka hlahisa lerato jwang? Lerato ke tokiso. Mme ehlile ke rata lefatshe... Ke—ke jewa ke tjheseho ya kereke ya Modimo.

<sup>187</sup> Le ho bona ditsamaiso tsena di e tlama tlasa ditshomo, e ntse e bola. Mme Modimo o tlaleha Lentswe la Hae e le Nnete, mme le jwale ba itshwarella ka yona. Amen. [Phutheho e re, “Amen.”—Mong.] E nepile. Le a tseba ke nnete, moena, kgaitseki. [“Amen.”] Ke Sena feela. Ke tsela e bonolo ho E bolela. Ha—ha se ka ho qhaqholla Segerike, le dintho, empa

ke ho qhaqholla le ho bontsha kelello e pala. Ruri le utlwisia Hoo. Pedi le pedi ke nne. Wa bona? Jwale re a tseba Hoo ho lokile.

Jwale, Lentswe le tlamehile ho hlahisa Monyaduwa.

<sup>188</sup> Empa tsamaiso ya kgale e loketse ho baballa mofuta wa yona. E loketse ho hlahisa Esau ya rekileng ka ditshwanelo tsa tswalo ya hae.

<sup>189</sup> Ke ena e fihla. Ke a e utlwa. Ke a tshepa ha le nkuke ke hlanya. Be, haeba ke le jwalo, ntloheleng. Ke thabile haholo tjena. Tjena ke motle ho feta mohla ke neng ke le ka hosele. Ekaba ke—ke a hlanya, ho lefatshe. Ke—ke—ke tseba moo ke leng teng. Ke tseba moo ke emeng teng.

<sup>190</sup> Shebang. E tliro tswala lesea la sefolofatsana, tsamaiso ya bodumedi e tliro teanya ditumelo tsohle mmoho, ho hlahisa Esau ya hloileng Jakobo. Amen. Ke a tshepa le a e bona, sefolotsana, sa bodumedi bo shweleng, tsohle di tla kopana hammoho.

<sup>191</sup> Oh, lona badumedi ba Lentswe, ineheleng Molaetsa wa ka. Nkutlweng, ha se Molaetsa wa ka, empa Molaetsa wa Hae oo A o tlalehang ka thata hore ke Nnete. O tlamehile ho kgetha kae—kae. O ke ke wa itulela ka kgutso ka morao ho sena. O tlamehile ho ikgethela.

<sup>192</sup> Hopolang tsatsi le leng, tlase mono Westward Ho, hoseng hoo, dijong tsa hoseng, kamoo Morena a ntumeletseng ho le bontsha koro eo? Kamoo e nyolohileng ka Luther, ka Wesley, le ditjellane, le jwalo, mme ha tswa makalana, kereke ka nngwe e bapisitswe ka hara tlhaka ya koro. Yaba e theoha e kena ka hara koro, kamoo e neng e le kateng, mme yaba ho fihla lekgapetla le le nyenyane leo, eka hlaku ya nnete ya koro hantle. Ha o tswa mme o ya sheba, ha o sa tsebe koro ya hao, o tla re mono o fumane koro, empa ke lekgapetla feela. Ebe o phetla lekgapetla leo, ha ho koro ka mono, ho hang. Motsheo kwana, ho ntse ho mela monoko wa bophelo. Nka galase mme o shebe. Mme mohla Pentekosta e ne e qala e hlahla, keha e atametse haholo, Jesu o boletse ho Mattheu 24:24, “Ho ka thetsa le bona Bakgethwa hola ke ntho e ka etswang.” E ne e tla etsa’ng? E le mosireletsi wa hlaku. Na ho jwalo? [Phutheho e re, “Amen.”—Mong.] Jwale, tjellane . . .

<sup>193</sup> Shebang mona. Leqoba ha le tshwane le hlaku e keneng, tjellane le yona ha e jwalo, e mpa e tshwana le yona ho feta. Atha lekgapetla le tshwana le yona ho feta, empa le jwale ha se koro. Ke mojari wa koro.

<sup>194</sup> Na ha le bone kamoo melaetsa eo e ttileng ka lehlaba la pelehi? Empa yaba Bophelo bo tswa mono hantle, ho fetela molaetseng o mong. Bophelo bo tswile ho Luther hantle, ho kena molaetseng wa Wesley. Ba tswa hantle molaetseng wa

Wesley, ho kena molaetseng wa pentekosta. Jwale nako e boetse e fihlile, ya ho siya lekgapetla. Molato ke'ng? Hlaho ke eo, ka tshobotsi yohle, ho paka hobane ke Nnete.

<sup>195</sup> Jwale le bona lebaka leo le nkukang ke hlanya. Ekaba ke jwalo, jwaleka ha ke boletse. Empa Ntho e teng ka ho nna. Ha ke kgone ho E kgutsisa. Ha se nna ya E beileng ka mono. Ha E a tliswa ka boikgethelo ba ka. Ke Modimo. Mme O a E paka, ho kgodisa hobane Ke Nnete, ho E etsahatsa e le Nnete. Ha se hore ke kwetile taba kgahlano le Luther, le Wesley, Mapentekosta, kapa Mabaptise, kapa mang feela. Ha se letho kgahlano le mang. Ke kgahlano le tsamaiso, hoba Lentswe le kgahlano le yona; e seng batho. Shebang baprista bana le tshebeletso ya bodisa e dutseng mona, kajeno. Hola ba mamela tsamaiso ba ka ba ba sa dula mona, empa ba bile sebete se pala, sa Lentswe la Modimo, ho hata ba etswa le ho Le amohela. *Alleluia* e bolela “ho bokwe Modimo wa rona.” E ke ke ya le ntsha kotsi. [Motho o re, “Amen.”—Mong.] Hoo ke ho re “a ho be jwalo.” Ke a Le dumela. Ke a dumela mme ke a tseba hore Ke Nnete. Le pakilwe e le Nnete. Ka tsatsi le leng o tla fumana ho le jwalo, mohlomong nako e se e o siile. Jwale ela hloko. Ela hloko.

<sup>196</sup> Bibele e itse, “Mosadi wa Hae o Itokisitse,” qetellong ya mongwaha. O kile A Itokisa jwang? Ho ka ba Mosadi wa Hae. Mme ebe O etsa'ng? Kana O ne a apere seaparo sa mofuta mong? Lentswe la Hae ka Sebele. O ne a apere ho Loka ha Hae. Ke yona. E nepahetse. Wa bona?

<sup>197</sup> Pono! Lemohang, ho kwaleng jwale. Ke batla ho bua nthwana e le nngwe ena feela pele ke kwala. Ke sona se tthusumedseng ho bua sena. Jwale, ke HO RIALO MORENA. Ha monna a rialo, ka ntle, a sa e nahane kelellong ya hae, e tla be e le moikaketsi mme o lokela ho ya diheleng ka yona. Ke hantle. Haeba a leka ho phutha sehlopha sa batho, batho ba lokileng jwaleka bana, mme a ba thetse, kgele, e tla be e le diabolosi ya entsweng nama. Modimo a ke ke a mo hlompha. Le hopola Modimo a ka hlompha diabolosi kapa leshano? Lekgale. Wa bona? E feta hodima dihlooho tsa bona, mme ha ba e tshware. O ntsha Bakgethwa.

<sup>198</sup> Shebang baporofeta bohole mongwaheng, kamoo A na a qhautsa Bakgethwa.

<sup>199</sup> Shebang, ho theoha jwalo, esita le ho fihla hlabollong. Jwaleka, kereke ya Roma e Katolike ha e tjhesitse Joan of Arc thupeng, ho thwe ke moloi. Ke hantle. Haisa-isaa ba mo fumana e ne e se yena. E ne e le mohalaledi. Ehlile, ba ile ba itlhokofatsa, ba epolla mmele wa baprista le ho e lahlela nokeng. Empa, wa tseba, empa hoo ha ho e batalatse dibukeng tsa Modimo. Tjhe. Ba kile ba bitsa Mohalaledi Patrick e mong, le yena, wa bona, mme o batla a itshwanela le nna hakaalo. Ka baka leo, re a elellwa, shebang bana ba hae. Shebang sebaka sa

hae, hodimo, shebang ho bolailwe bokae. Shebang dipalo tsa bashwela-tumelo le bone palo e bolailweng mono. Bonang, ha ho se jwalo.

<sup>200</sup> Empa maipolelo a batho, ha a lokise letho. Ke seo Modimo o se buileng o se kgodisang, hore ke Nnete. “Le leke dintho tsohle. Le tiisetse ho tse molemo.”

<sup>201</sup> Jwale re a fumana, jwale, mona dikgwedi tse mmalwa tse fetileng, hoseng ho hong, ke ne ke tsamaya ke tswa tlung, mme pono ya hlaha.

<sup>202</sup> Ke phepetsa mang le mang mona, ya tsebileng dilemo tsena tsohle, ho bolela mohla Morena a kileng a re “HO RIALO MORENA” haese se etsahetseng. Ba bakae ba tsebang e le Nnete, phahamisa letsoho la hao. [Phutheho e re, “Amen.”—Mong.] Hantle. Motho o teng ya buang a hanyetsa? [Moena Branham o a thola. Phutheho e kgutsitse.] E nepahetse.

<sup>203</sup> Le se tsotelle moromuwa. Le mpe le shebe seo Molaetsa o leng sona. [Phutheho e re, “Amen.”—Mong.] Ke yona taba. Wa bona? Ha se ntho eo. Le se tsotelle nthwana [Sekgeo lebanteng.] ralefatla, wa tseba, motho, hoba e mpa e le—e mpa e le sebopuwa motho, bohole, mme bohole re a itshwanela. Le mpe le ele se etsahalang hloko. Ke sona se e tlalehang. Ke ile ka nnkwa . . .

<sup>204</sup> Jwale, kea tseba batho ba bua dintho tse mefuta yohle, mme re tseba boholo ba tsona bo sa nepahala. Nke ke ka arabela ba bang, seo monna e mong a se buang. Ke tlameha ho arabella seo ke se buang. Nka bua feela hore na ke Nnete, kapa tjhe. Mme ke—ke—ke nna ya tlamehang ho ikarabella yona, e sang seo motho e mong a se buang. Nke ke ka ahlola motho. Ha kea romelwa ho ahlola, empa ho rera Molaetsa. Lemohang.

<sup>205</sup> Ke ne ke tlamehile ho boha e—e penelopele ya Kereke. Mme yaba ke nnkwa ke e Mong eo ke sa kgonang ho mmona, mme ka ntso bewa hodima, ho kang, kalana. Mme ka utlwa mmino o monate ka ho fetisia oo nkileng ka o utlwa. Mme ka sheba, ho tlang, mme e le sehlopha sa mafumahadi, nkare, ba ka ba, oh, dilemong tsa mashome a mabedi, leshome le metso e robedi, mashome a mabedi. Mme bohole ba le meriri e melelele, mme ba itlhophile ka mese e fapaneng, mofuta, mese. Mme ba hwanta ka phethahalo ka setapo, mmoho le mmino oo, kamoo ho ka etswang. Mme ba hlaha ka letsohong la ka le letshehadi, ba pota ka mokgwa *wona*. Mme ka ba shebella. Mme yaba ke tadima ho bona Ya neng a bua le nna, mme ke sa bone motho.

<sup>206</sup> Yaba ke utlwa ho e tla sehlopha sa mmino wa rokon-rolo. Mme ha ke retolohela letsohong la ka le letona, ka *mona* keha ho nyoloha, ho kgutla, dikereke tsa lefatshe ke tsena di e tla. Mme tse ding tsa . . . E nngwe le e nngwe e jere folaga ya bona, moo ba tswang teng. Tse ding tsa dintho tse ditshila ka ho fetisia tseo nkileng ka di bona bophelong ba ka! Mme yareha

kereke ya Amerika e nyoloha, e le ntho nyonyehang ka ho fetisisa eo nkileng ka e bona. Ntate wa Lehudimo ke Moahlodi wa ka. Ba ne ba apere mese ena ya letheka e meputswa ya tattletale, e kang ya banana bana ba tameneng, e se nang mokokotlo, hodimo *mona*; ho tshwerwe sephetjhana sa pampiri e boputswa; mme eka ho tjekwa motjeko wa hula; ferefef; ka moriri o bokopa, o ponngweng; ho tsujwa disakrete; mme ba thwista, ha ba ntse ba eya ba terepela le rokon-rolo.

Mme ka re, “Na eo ke kereke ya Dinaha tse Kopaneng?”

Mme Lentswe la re, “E, ke yona.”

<sup>207</sup> Mme eitse ha ba feta, ba tlameha ho e tshwarella *tjena*, mme ba bea pampiri ka morao ho bona ha ba feta.

<sup>208</sup> Ka—ka qala ka lla. Ka—ka mpa ka nahana, “Hara boikitlaetso baka bohole, le sohle seo ke se entseng.” Le sohle seo bareri ba sebeditseng mmoho ho se fihlela... Mme, baena, ha ke—ke tsebe dipono tsena le di dumela ha kae; empa ke Nnete, ho nna. Esale di pakilwe di nepile. Eitseha ke bona seo, le ho tseba se eng se etsahala, yaka pelo ya ka e qhibiliha ka hare ho nna. “Ke entse’ng? Ebe ke e fositse jwang? Esale ke eme le Lentswe leo, Morena. Mme ebe ke e entse jwang?”

<sup>209</sup> Ka nahana, “Hobaneng O ne o mphe pono, nakwana e fetileng, le ho ipona ke le teng Mono? Mme ka re, ‘Be, na ba tla tlameha ho ahlolwa?’ A re, ‘Sehlopha sa Pauluse, le sona.’ Ka re, ‘Ke rerile lona Lentswe a le boletseng.’” Borakgwebo Ba Bakreste ba ne ba hatisitse seratswana sa yona. Mme ka re, “Hobaneng? Hobaneng e tlamehile ho ba tjena?”

<sup>210</sup> Ka bona mphi eo ya diotswa e feta jwalo, tshole di apere jwalo, mme ha thwe, “Kereke ya Mofn. U.S.A.” Ka akgeha feela.

<sup>211</sup> Yaba, ka kotlolohoho, ke utlwa mmino o monate oo o boela o kgutla, mme Monyaduwa e monyenyanee eo ke enwa a e tla hape. A re, “Ke yona ntho e tswang, leha ho le jwalo.” Mme yareha A feta, O tshwana hantle le Eo ya tlileng pele, a itsamaela a kgema le mmino wa Lentswe la Modimo, a hwanta a feta. Mme eitseha ke e bona, ka ema mono ke phahamisitse matsoho a mabedi, ke lla, ka tsela *eo*. Ha ke re pha, keha ke eme mathuleng a ka kantle mono, ke shebile ka nqane ho tshimo.

<sup>212</sup> Eng? Eka kgona e be Monyaduwa ya tshwanang, wa mofuta oo, mmpo wa hae o tshwana le wa Eo wa ho qala. Jwale balang Malakia 4 le bone na ha re a tlameha ho ho fuwa Molaetsa matsatsing a qetelo, o tlang “ho busetsa dipelo tsa bana morao ho bontate,” morao ho Molaetsa wa manttha wa pentekosta, Lentswe ka Lentswe. Baena, re fihlide.

<sup>213</sup> Jwale, kereke ena e tlameha ho fuwa pontsho, e leng ponsho ya yona ya ho qetela. Re a fumana mona, mono ho—

mono ho—mono Lengolong, bonang jwale, wa bona, mahlaba a maholo a pelehi esale a tshwere mongwaha wona wa Laodisea. A tsitsipanya. Kereke ya bona e ntse e tswalwa labobedi. E seng...

<sup>214</sup> Ho ke ke ha hlaha mokgatlo o mong. Mang le mang wa tseba ka nako ha molaetsa o ne o tswa... Botsang boranalane bana. Hoba molaetsa o tswe, mokgatlo o ne o tswa ho wona; oh, Alexander Campbell, ntho ka nngwe, Martin Luther, le ntho ka nngwe. Ba ne ba bope mokgatlo ka yona. Mme ka tlwaelo molaetsa o tsamaya dilemo tse ka bang tharo feela, tsoseletso. Ena esale e tsamaya dilemo tse leshome le metso e mehlano, mme ha ho mokgatlo o tswileng ho yona. Hobaneng? Ntho ya ho qetela e ne e le lekgapetla. Re qetellong.

<sup>215</sup> Na le bona mahlaba a pelehi? Na le bona bothata? Ke masalla feela a tla ntshwa. Ke masalla feela a tla ntshwa. Mme ke ka hona ke llang, mme ke hatella, mme ke sututsa, mme ke qhela thekolohela yohle ya motho lefatsheng, ho fumana mohau ho Modimo, le ho itsamaela feela ka Lentswe la Hae.

<sup>216</sup> E kene mahlabeng. Ke bona bothata. E tliro beleha. E tlameha ho ikgethela. Mongolo o ngotswe leboteng. Re bona kereke e le mothating wa ho tsamaya. Ke hantle. Mme re bona kereke, e bodile hona, e mothating wa ho tsamaya. Mme mahlaba a pelehi a hodima yona yohle, hodima lefatshe le hodima kereke.

<sup>217</sup> Mme lefatshe le letjha le se le tla tswalwa, mme ho tswalwe le Kereke e ntjha, ho ya teng, bakeng sa dilemo tse Sekete. Re tseba seo.

<sup>218</sup> Shebang. Modimo o e nea... Le ntano mamela sena ka kelohloko, ke ntano kwala. Pontsho ya yona ya ho qetela; Molaetsa wa yona wa ho qetela, pontsho ya yona ya ho qetela. Pontsho ya yona ya ho qetela, ke yona, e tlameha ho kena maemong a kang a tshimolohong; lefatshe, kereke.

<sup>219</sup> Shebang kamoo ho etsahetseng qalong, dilemong tseo tsohle, ka ntle, ho tloha ho Malakia ho fihlela ho Jesu. E shebeng, dilemong tseo tsohle jwale. E shebeng, ho fihla morao koo, bobodu boo ba wetseng ho bona. Shebang lefatshe, kamoo le bileng kateng nako le nako, jwaleka matsatsing a Nowe, le jwalo. Le tlamehile ho ema bapiso e tshwanang, mme re bona seo. "Jwaleka ho bile matsatsing a Nowe." Re bona dintho tsohle di ntse di ipapisa hantle.

<sup>220</sup> Yaba, re fumana pontsho e le nngwe ya ho qetela. Ho Luka, kgaolo ya 17, temana ya 28, Jesu o boletse, "Jwaleka matsatsing a Sodoma, ho tla ba jwalo ho tleng ha Mora motho." Hoba, jwaleka ho etsahetse Sodoma, wa bona. Jwale, Jesu o badile Bibebe yona ena, yona Genese eo re e badileng. Jwale, ka kelohloko, le se e fose. Yona Bibebe eo re e badileng, Jesu

o e badile. Mme O boleletse Kereke ya Hae, “Hetlang le bone mohla matsatsi a Sodoma a kgutlang,” batho ba kgopameng, banna ba lahlehelwang ke hlaho ya bona.

<sup>221</sup> Shebang bosodoma, kamoo bo jang setsi lefatsheng kajeno, lehlaseding la ditaba haufinyane. Eka le ka kena ofising ya ka ya la bala mangolo a tswang ho bomme, ka bashanyana ba bona. Mme bosodoma bo ntse bo e ja setsi, ke a kgolwa, ke mashome a mabedi lekgolong kapa mashome a mararo kwana—kwana California, e le nngwe, ngwahola. Sehlophahadi sa... esita le batho ba mmuso, ba ipakile e le basodoma. Lona banna ba kabelong ya mmuso le tseba seo. Makasine wa lona, ke o badile, le dinthong tse fapaneng tse hlahileng. Hola o ka...

<sup>222</sup> [Kgaitsemi e mong o bua ka puo ese, a ntano hhalosa. Yena kgaitsemi eo o bua ka puo ese, a ntano boela a hhalosa. Sekgeo lebanteng—Mong.]

<sup>223</sup> Ke utlwisia Lengolo ka tshwanelo. Ke hantle seo Modimo a se boletseng se tla hlaho. “Ya buang ka dipuo a rapele hape hore a hhalose.”

<sup>224</sup> Hoo ho nepile. Ke le boleletse Nneta, ha ho le jwalo Modimo o teng mona, ho Le thasisetsa. Ke Nneta. Hoo ho nepile.

<sup>225</sup> Jwale shebang. Molaetsa wa ho qetela oo Jesu a o buileng ke ofe? “Jwaleka matsatsing a Sodoma,” jwale elang hloko, pejana lefatshe la Baditjhaba le tjheswa, mollo. Jwale lekang ho utlwisia. Ha etsahalang? Ho ena le sehlopha sa batho, maloko a fofo a kereke, jwaloka Lota le sehlopha sa hae tlase Sodoma. Ho boele ho be le monna ya seng a tswile ho yona. A se kahara yona, le ho qaleng. Yena e le Abrahama, yena ya kakatletseng tshepiso ya mora a tlhang. Le a utlwisia? E reng, “Amen.” [Phuhthehoe a re, “Amen.”—Mong.] Ho lokile.

<sup>226</sup> Mme, jwale, pejana ho sehlohlolo sa tshenyeho, Modimo o ipontshitse Abrahama ka dibopeho tse ngata, empa kgetlong lena O itlhahisa e le Monna. E ne e le Monna. Mme a nyoloha a tla ho Modimo.

Jwale, o re, “E ne e se Monna.”

<sup>227</sup> E—e—e—ne e le Modimo ka hara Monna. Abrahama o Mo bitsitse, “Elohim.” E ne e le Monna.

<sup>228</sup> Mme, le shebe, A dula fatshe, A furaletse tente, mme A re, “Sara mosadi wa hao, o kae?”

Ho re, “O ka tenteng, ka mora Hao.”

<sup>229</sup> Ho re, “Ke tla o etela ka nako ya bophelo, etswe Ke o tshepisitse.” Mme Sara a tsheha. Mme A re, “Sara o tshehetseng?” Wa bona?

<sup>230</sup> Jwale, ke se neng se etsahala letsatsing leo. Feela ho bontsha pontsho ya ho qetela eo Abrahama a e boneng,

Sehlopha se kgethilweng se ntshitsweng, hole le Sodoma. Jwale, le se fose papiso ena, leha le ka etsang. Sehlopha se ntshitsweng, se neng se se Sodoma, le ho qaleng.

<sup>231</sup> Empa Mangeloi a mabedi a theoha a kena Sodoma. Mme ha Ba filha tlase mono, re fumana Lota. Mme O mo fumane a wele mohaung, hara basodoma bohle le dikgopamiso. Le tseba pale eo.

Empa e Mong a sala le Abrahama, yena e le Elohim.

<sup>232</sup> Tlase mono ba ile ba bolela Lentswe. Thero ya Lentswe ya ba otla ka bofofu, mme ba sa fumane monyako. Ke yona taba kajeno.

<sup>233</sup> Empa Ya setseng le sehlopha se ntshitsweng, o entse mohlolo ka pela Abrahama, ho bontsha hore E ne e le Mang, mme a ena le Abrahama.

<sup>234</sup> O itse, “Sara o tshehetseng?” mabapi le lesea lena. Yaba Sara o bitoha a re ha a etsa letho. Mme ha thwe, “Empa o e entse.” Mme A ka be a mmolaile hantle mono hola e se karolo ya Abrahama.

<sup>235</sup> Le jwalo Modimo hola re se karolo ya Kreste o ka be o re bolaile. Mohau wa Kreste o re bolokile bohle mmoho, rona babelaedi le ka dikgopamiso tse Lentsweng.

<sup>236</sup> Empa, lemohang, lemohang se hlahileng. Jesu o boela a kgutla jwale, le ho re, “Jwaleka matsatsing a Lota, ho tla ba jwalo nakong ya bofelo mohla Mora motho a Itshenolang.” [Sekgeo lebanteng—Mong.] Wa bona? “Mora motho” kamehla, ka Bibeleng, ke *moporofeta*. Wa bona? O tla ka Lebitso la bara ba bararo: Mora motho, Mora Modimo, Mora Davida. Wa bona? Mme O qapolotse Lebitso la Hae, “Mora motho,” hoba e le mosebetsi A o entseng, wa moporofeta, seboni. O itse, “Matsatsing a kang a Nowe, mohla Mora motho a qalang a Itshenola, e tla be e le nako ya bofelo ba nako.”

<sup>237</sup> Jwale ha re nahaneng feela, motsotsotso feela. Lefatshe ha le eso fumane moromuwa lefatsheng. Re fumane bo Finney, bo Sankey, bo Moody, bo Finney, Knox, Calvin, le ba jwalo, lefatshe ka bophara, baromuwa ba yang dikerekeng mahlabeng ana a pelehi. Empa ha re eso fumane monna ya tswang ka molaetsa o yang ka lefatshe lohle, hofihlela letsatsi lena, eo lebitso la hae le qetellang ka h-a-m. A-b-r-a-h-a-m, e leng dihlaku tse tsheletseng... A-b-r-a-h-a-m ke dihlaku tse supileng.

<sup>238</sup> Kajeno re fumana e mong ya bitswang G-r-a-h-a-m, dihlaku tse tsheletseng, mme tshelela ke palo ya lefatshe, letsatsi la hlolo. Lefatshe le kile la fumana neng monna ya kenang ho lona jwale, ho rera tlase kwana *kosmos*, tlase mono lefatsheng, tlase mona ho bitsa batho, “Bakang, bakang! Timelang, kapa le tswe ho lona,” ho fihlela mongwaha wona? G-r-a-h-a-m, shebang seo a se etsang, o bolela Lentswe, o

foufatsa ba ka ntle, o a bitsa, “Tswang,” moromuwa ya tswang ho Modimo. Jesu o boletse seo se tla hlaha feela mohla Mora motho a tla Itshenola. Jwale, hono, ntho eo e hokae? Ka ntle koo ditaelong tsa kereke, lefatshe. Mme ba qadile ba hloya monna eo, ka yona.

<sup>239</sup> Empa, hopolang, ha ba le sehlopha, hape, sona e le sehlopha sa moyo, sehlopha sa Jakobo, e seng—e seng sehlopha sa Esau. Sehlopha sa Jakobo ke seo se neng se lebeletse mora, se se kwana hara Babilona eo, mme ba amohela Moromuwa. Le a utlwisia? [Phutheho e re, “Amen.”—Mong.] Abraham, A-br-a-h-a-m, ba amohetse Moromuwa. Mme Moromuwa eo, ntho e kgolohadi e ne e le efe, e tswileng ka mahetla A e entseng, ho supa hobane nako ya bofelo e fihlile? O senotse mehopolo e dutseng kelellong ya Sara.

<sup>240</sup> Mme Jesu, Mora Modimo, ya neng a etswe nama, ho supa hobane Moya wa Modimo o tla boela o kgutlela hodima Sehlotschwana sena se kgethiliheng sa nakong eo ya qetelo, mme o tla boela a Itshenola ka mokgwa o tshwanang. Mahlaba a pelehi! Oh, moena, lekang ho utlwisia hleng. Lekang ka matla. Bulang dipelo tsa lona motsotso feela. Tadimang ho Kreste. Wona Modimo oo o teng mona jwale. Yena Eo. O tshepisitse dintho tsena. Mme efela haeba A di tshepisitse, O tsebisisa ruri ho di phetha.

<sup>241</sup> Ha re inamiseng dihlooho tsa rona nakwana. Ke batla le nahane feela, le ntse le hlabehile.

<sup>242</sup> Ntate, e matsohong a Hao jwale. Ke entse sohle seo nka se etsang. Ke O rapela ho thusa batho ho—ho utlwisia. Peo e se e jetswe. Ako tshele metsi, Moya, hodima Yona, Morena, mme O e noseletse tshorisong ya Hao. Haeba ke entse phoso, Morena, ke ne ke sa ikemisetsa. Ke a rapela, Modimo, hore—hore O tle o Le toloke ka tshwanelo, dipelong tsa bona, ba tle ba bone mme ba utlwisia. Aba sena, Morena. Ka Lebitso la Jesu, ke a rapela. Amen.

<sup>243</sup> Morena a le hlohonolofatse. Ke a le rata. Wona Modimo o rerileng Lentswe lena, wona Modimo o jereng boikarabelo ba Lentswe lena... Ke mpa ke jere boikarabelo ba ho Le bua. Ke Yena ya Le phedisang. Wona Modimo oo o teng mona.

<sup>244</sup> Jwale, ba nang le hloko ka ntle koo ba bakae? Phahamisa letsoho la hao. Ana O tshepisitse ho etsa dintho tsena matsatsing a qetelo? Jwale tadimang ho nna. Jwale ho jwaloka Petrose le Johanne ba boletse, “Re tadime.” Eka hoja... Wa bona? O ne a mmolelle. Jwale le tadime ka mona. Jwale, le se phethesele hleng. Taba ena haholo e... Ke—ke ntse ke leka, ka pelo ya ka yohle ka ho nna. Ebang le hlompho e shweletseng. Wa bona? E mong le e mong wa lona, ke moyo, ha o phethesela. Ehlide, wena o motlotlwana o ikemetseng. Ke ntse ke leka ho qhautsa tumelo ya batho.

<sup>245</sup> Mosajana o kile a feta a ama seaparo sa Hae, a tloha a itulela fatshe. Jesu a mmolella mathata a hae e ne e le afe, mme o ne a fodiswe.

<sup>246</sup> Mme jwale O tshepisitse ho boela a etsa jwalo, Mora motho o tla boela a Itshenola mokana A entse Sodoma. Lefatshe le kene maemong ao. Kereke e kene maemong ao. Jwale na Modimo o bolokile Lentswe la Hae? Bonang haeba A kgonne, kapa tjhe. Oh, re bile le dipontsho, ho tlolaka, ho bua ka dipuo, boporofeta, le dintho tse jwalo. Empa, be butleng, pontsho e nngwe e teng. Oh, re fumana boipeho bo bongata ba nama. Hoo ho mpa ho tjhabisa ntho ya mannete ho e hlakisa. Dolara efe feela ya moshaqane e ye e bentshe ya mannete.

<sup>247</sup> Jwale le rapele. Le dumele. Feel a, ke—ke le phepetsa ho etsa jwalo. Le shebe, le dumele seo ke le boleletseng sona. Ba bakae ba dumelang sena e le Nneta? [Phutheho e re, “Amen.”—Mong.] Ho sa tsottelehe o mang, moo o leng teng. Feel a ke tla . . .

<sup>248</sup> Mang le mang ka mona, ho latela tsebo ya ka, ke molata ho nna, ntle le Bill Dauch le mofumahadi wa hae ya dutseng mono, kamoo ke tsebang. Ke a kgolwa ke tseba morerinyana enwa mona tswang Jeremane, ya dutseng mono. Le, moena, le batho ba babedi kapa ba bararo ba dutseng hantle mono.

<sup>249</sup> Motha e mong motsheo ho letshwele, tadima, motsheo kwana. Ke o phepetsa ho dumela seo ke o boleletseng sona ke Nneta.

<sup>250</sup> Ho ka thweng ka mohla Lengeloi leo la Morena le theohelang nokeng tlase mono, dilemo tse fetileng tse mashome a mararo a metso e meraro, le etsa hlahiso ena? Ke tsebile jwang?

<sup>251</sup> Esita le modisa wa ka wa Baptise o ne a nteleke kerekeng, ho re, “O—o ne o tshwerwe ke sesitahlohvana, Billy.”

<sup>252</sup> Ka re, “Sesitahlohvana, le letho, Ngaka Davis. Ke kamoo wena, boitshwaro ba hao, o ka hla nna wa nkamoha setlankana sa ka sa botho.”

<sup>253</sup> Ke tsebile motho o tla ba teng, sebakeng se seng, ya tlang ho O dumela. Modimo ha o ke o romela Molaetsa ho se motho ya tla O amohela.

<sup>254</sup> Oh, ehlide, mohla ke tswang ke rapella bakudi, keha ho le monate. Empa mohla ke qalang ke le bolella Nneta ya Lentswe, keha ho fapanie. Le tlamehile ho tseba. Molaetsa o mong le o mong esale o le jwalo.

<sup>255</sup> Jesu o kile a ratwa mohla A kenang kerekeng mme a fodisa batho, le ntho tsohle. Empa mohla A ne a dula fatshe tsatsi le leng, le ho re, “Nna le Ntate re bang,” oh, hoo, yaba ke phetho.

"Ha le sa je nama ya Mora motho, le sa nwe Madi a Hae, ha le na Bophelo ka ho lona." Ha A ka a Le hhalosa. A batlile ho bona ya tla ema lehlakoreng la Hae. Hantle.

<sup>256</sup> Le nahanang, e—e letshwele le akgang dingaka le dintho, ho thwe, "Monna eo ke... Kgele, Ke senwamadi. Ho ja nama ya Hae le ho nwa Madi a Hae?" Ha A ka a Le hhalosa. Ha A ka a Le hhalosa.

<sup>257</sup> Empa, le jwale, Lentswe leo le ne le itshwareletse, ho baapostola bao. Ba sa tsotelle. Ba sa Le utlwisise. Ba Le dumetse, leha ho le jwalo. Wa bona? Ba tsebile, hoba ba ne ba bone mesebetsi ya Modimo, mme ba e tsebile e le yona. O itse, "Ke yona e Mpakang."

<sup>258</sup> Monna ke enwa, mosadi ya dutseng hantle mona, o phahamisitse letsoho la hae. Jwale, le ka mpitsa lehlanya, ha le batla; empa yona Topallo ya Mollo, e tsamaisitseng bana ba Iseraele lefeelleng, e hodima mosadi yane hantle.

<sup>259</sup> Jwale, hopolang, Jesu o boletse, "Ho se ho se hokae mme lefatshe ha le sa tla Mpona, empa lona le tla Mpona. Ke tswile ho Modimo. Ke kgutlela ho Modimo," ka morao ho lefu la Hae, kepelo. O ne a bolelle Bajuda. O itse, "Ke..."

<sup>260</sup> E ne e le Lefika le lefeelleng. E ne e le Topallo eo ya Mollo, "KE NNA YA LENG TENG." E ne e le mang "YA LENG TENG"? Topallo ya Mollo e sehlahleng seo se tukang. Na ke nnete? [Phutheho e re, "Amen."—Mong.] Mme O ne a etswe nama a aha hara rona. Ho re, "Ke tswa ho Modimo, mme ke kgutlela ho Modimo, ke tle ke kgone ho kgutla ka sebopoho sa Moya o Halalelang."

<sup>261</sup> Mme Ke enwa, o na le rona kajeno, difoto tsa Lona tsa mahlale di katladitswe. Ke enwa moo A leng teng, ho paka ho feta foto efe feela ya mahlale, ntho efe feela. O teng mona, ho e paka, hobane Ke Yena. "Nna Mora motho ke tla senolwa letsatsing lena." Jwale, ke eo *moo* A leng teng. Ke ntse ke E tadimile hantle.

<sup>262</sup> O re, "O a Le bona na?" Johanne o Le bone, le yena, empa ba bang ha ba kgona.

<sup>263</sup> Shebang, ho e kgodisa jwale. Mosadi eo ke molata ho nna. Ha ke eso mmone—mmone, bophelong ba ka. Empa o ntse a rapella setho sa hae se phoso. Ke... Ho jwalo, mofumahadi. O sa tswa etswa oporeishene hodima sona. Ya dutseng pela hao ke monna wa hao. Ha o tswe mona. O tswa California. Lebitso la hao ke Roland. Lefu la hao la mala le kgauditse, le lona, monghadi. O ne o jewa ke mala. Ha ke re? Be, ho fedile ka lona. Moomo wa hao o fodile.

"Mehleng eo Mora motho..."

<sup>264</sup> Mona, o dutse hantle motsheo *mona*, monna ke eo. Ke monna wa mmala, o jewa ke mahlo. O a... E. Yena, mosebetsi

a o sebetsang, o amana le makoloi, o polisha makoloi, tshasa makoloi. Hantle. Mahlo a hao a mpefala. O sa tswa dumela, ha ho jwalo? O hlahetswe ke mohlolo o moholo. Lebitso la hao la pele ke Fred. Ke hantle. Seboko sa hao ke Conn. Ke hantle. O a dumela jwale? Mahlo a hao ha a sa tla o hlopha. Ha ke eso bone monna eo bophelong ba ka.

<sup>265</sup> Monna ya dutseng hantle morao mane, ha a tswe mona, le yena. O tswa California. Mokokotlo wa hae o mobe, Mongh. Owens. Ke wena. Morena Jesu o a o fodisa. Ha ke eso bone monna eo, bophelong ba ka, ha ke tsebe letho ka yena. Ke mpa ke setse Lesedi leo morao ha Le ntse le tsamaya.

<sup>266</sup> “Ha o ka dumela, tsohle di ka etswetswa ba dumelang.”

<sup>267</sup> Thaka le dutseng mona, o tshwerwe ke hernia, o rwetse digalase le ka sutu e putswa. Fred, ha o e dumela Modimo o a o fodisa. O tla e amohela? Ho lokile. Ha ke eso mmone, bophelong ba ka.

<sup>268</sup> Mof. Holden, ya dutseng lephakong la hae mono, o jewa ke leihlo. Ha ke tsebe mosadi eo, ha ke eso mmone bophelong ba ka, empa hoo ke nnete. Wa bona? “Ha o ka dumela.”

<sup>269</sup> O ntse o llelang, kgaitse? O tshwerwe ke methapo, bronkhaitisi, lefu la pelo. O a dumela Modimo o tla o phekola? Wena ya dutseng ntlheng ya setulo mono. Haeba o dumela, ka pelo yohle ya hao, Jesu Kreste o tla o fodisa. Methapo eo yohle e tla o lesa, o ikutlw a eka o boetse setlwaeding. Diabolosi o ntse a o thetsa. O a e amohela na? Jwale ako phahamise letsoho la hao, o re, “Ke tilo e amohela, ke hona.” Ke botle. Ho fedile.

<sup>270</sup> Eng? Kereke ena e tshwerwe ke lehlaba la pelehi. Ana o ke ke wa ikgethela ka pela Sefahleho sa Hae hona jwale? Ke le bontshitse Lentswe ka nepahalo, seo A ipoletseng A tla se etsa.

<sup>271</sup> Phaposi ena e a phophothwa, ako botse motho ya kileng a tewa, kapa ha buuwa le yena, kapa seo e neng e le sona, mme le bone haeba nkile ka ba bona, ho ba tseba, kapa le letho mabapi le bona. Le nahana motho a ka etsa jwalo? Eo hase ntho e ka etsahalang le ka mohla.

<sup>272</sup> Be, Ke eng? Mora motho. “Lentswe la Modimo le bohale le fetisa sabole e leoditsweng ka nqa tse pedi, le ahlola moyo, merero ya pelo.” Mokana Le entse mohla Le neng le entswe nama mona lefatsheng, ka ho Mora wa Modimo, jwale Le senolwa ke Mora Modimo mme O tlide ho bitsa Monyaduwa ho mo ntsha tsamaisong eo. “Tswang ho yona. Le kgethehe, ho bolela Modimo. Le se ame disila tsa bona, mme Modimo o tla le amohela.”

<sup>273</sup> Na le ikemiseditse ho nehela bophelo bohole ba hao ho Modimo? Haeba o etsa jwalo, ema ka maoto a hao, o re, “Ke tla etsa jwalo, ka mohau wa Modimo, ho Le amohela hona jwale, ka tsohle tse ka ho nna!”

<sup>274</sup> Allelu! Ho bokwe Modimo! Le a Mo dumela? [Phutheho e re, “Amen.”—Mong.] Ha ho le jwalo phahamisang matsoho a lona feela mme le rapele le nna.

<sup>275</sup> Ipolele tshito ya hao. Mahlaba a pelehi! Ho thata ho shwa, empa aka shwe hona jwale. Ako shwe, tswa ho se dumeleng ha hao. Tswa ho bona. Ena ke ponahatso ya Lentswe la Modimo, mokana Le entse mohla Jesu a fihlang lefatsheng. E boetse ke Jesu Kreste hara lona, o a pakwa.

<sup>276</sup> Abrahama o fumane mora hang-hang, mora wa tshepiso, hoba hoo ho etsahahale.

<sup>277</sup> Mme Jesu o tla hape. Ke Moya wa Hae oo. O haufi le lefatshe haholo, o haufi le ho tla, hoo A ikemiseditseng ho o amohela, haeba o o kemiseditse ho Mo amohela.

Jwale phahamisang matsoho a lona le rapele le nna.

<sup>278</sup> Morena Modimo, a baptista bohole ba tiisetse dialetareng. A batho ba bokolle. A Topallo ya Mollo le Topallo ya Leru di kene ka ho batho kajeno di ba fadimehise, Morena, ho elellwa Sefahleho sa Modimo o phelang le o matla. Aba sena, Morena. Ba amohele. Thapelo ena ke e rapella e mong le e mong wa bona, ka Lebitso la Jesu Kreste.

<sup>279</sup> Tlatsa e mong le e mong ka Moya o Halalelang, ya se nang Moya o Halalelang. Morena, tsoseletso ya letsholo lena, tshebeletso ena, hona jwale e ke e phatlohe e be kgolo, ebe tsholoho ya tonana ya Moya o Halalelang. Bakudi ba fole, difofu di bone, diritsa di tsamaye. Ponahatso ya Modimo o phelang e hlahiswe ka pela batho, jwaloka ha ho etsahetse thapama ena, mme batho ba e amohele. Ka Lebitso la Jesu Kreste, ke a e kopa.

<sup>280</sup> Phahamisang matsoho a lona jwale le Mo rorise, le amohele seo le se kopileng.



*MAHLABA A PELEHI* SST65-0124  
(Birth Pains)

Molaetsa wona, ka Moena William Marrion Branham, o rerilwe sethatong ka Senyesemane ka Sontaha thapama, Pherekong 24, 1965, sebokeng sa Matjhaba sa Borakgwebo ba Full Gospel mane Ramada Inn, Phoenix, Arizona, U.S.A., o ntshitswe kgatisong ya teipi ya makenete mme o ngotswe o sa kgaolwa ka Senyesemane. Petolelo ena ya Sesotho sa Borwa e ngotswe mme e abjwa ke ba Voice Of God Recordings.

SOUTH SOTHO

©2013 VGR, ALL RIGHTS RESERVED

VOICE OF GOD RECORDINGS, SOUTH AFRICA OFFICE  
P.O. Box 178, SOMERSET WEST, 7129 CAPE PROVINCE,  
REPUBLIC OF SOUTH AFRICA

VOICE OF GOD RECORDINGS  
P.O. Box 950, JEFFERSONVILLE, INDIANA 47131 U.S.A.  
[www.branham.org](http://www.branham.org)

## Temoso Ea Tokelo Ea Qopitso

Litokelo tsohle li babaletsoe. Buka ena e ka porintoa ka porintara ea lelapa molemong oa motho eo kapa ea abjoa, ntle ho tefiso, e le thepa e jalang Evangeli ea Jesu Kreste. Buka ena e ke ke ea rekisoa, ea boela ea hilahisoa ka bongata, ea manehoa leboteng la website, ea bolokoa ka tsela eo e ka boelang ea ntšoa, ea fetoleloa ka lipuo lisele, kapa ea sebelisoa ho qela matlole ntle le tumello e ngotsoeng ea Voice Of God Recordings®.

Ho fuoa boitsebiso bo bong kapa bakeng sa thepa e nngoe e ka fumanoang, ka kopo ikopanye le:

VOICE OF GOD RECORDINGS  
P.O. Box 950, JEFFERSONVILLE, INDIANA 47131 U.S.A.  
[www.branham.org](http://www.branham.org)